


淮南中十場誌

智



淮南中十場誌卷之八

藝文略

章往述來莫先於文則見禮知政之大  
凡也况乎  
觀風問俗納價陳詩古今之世運關焉至於考道  
問德研究性命引斯文於不墜又道統所在也哀  
而輯之豈非一方之文獻乎志藝文

誥勅

宋

錫湖南提刑按察司副使徐翊誥命

拼茶

奉天承運皇帝制曰朕北帳蒙塵南圖浴日鎮藩庶  
士褒序惟均行屬廉能夙抱忠悃恩賚奚空後也爾  
湖南按察司副使徐翊英蜚宦胤詔列仕途始服采  
於郡丞遂陞除於邑宰清廉著茂敏幹呈華頃擢署  
兵權佐襄安撫朕茲沛慶爾得初授今官始進階中  
順大夫錫之誥命夫按察掌肅綱振紀之職以作干  
城乃口庭南則甚要以重矣然恪守官常式孚民望  
以待任使而樹勲猷毋負朕之簡也欽哉

咸淳九年

八月二十一日

男

封指揮僉事繆全誥命

拼茶

奉天承運皇帝制曰昔聖王之制天下也必資威武  
以安黔黎未嘗專修文而不演武朕特倣古制設武  
職以衛治功受斯任者必忠以立身仁以撫衆智以  
察微防奸禦侮幾無暇時能此則榮及前人福延後  
嗣而身家永保矣敬之勿怠

永樂十二年十月二十日

賜大學士高穀歸田勅

丁溪

勅工部尚書謹身殿大學士兼東閣大學士高穀卿

以智識文學執經事朕恭慎小心積有歲年今朕復  
正大位圖任經筵舊臣以緝熙聖學以寅亮天工而  
卿以老疾懇乞休致然投老之請雖未至於引年而  
懷舊之私實有切於朕意惟功成身退乃天之道故  
特賜允以遂卿情復遣勅諭意并賜白金楮幣金織  
襲衣仍給驛舟送卿還鄉卿之歸也日與親戚故舊  
徜徉丘園展契濶之深懷道朝廷之盛事清風高致  
足以勵廉而革貪盛德雅望足以敦化而善俗則卿  
亦永有終譽焉故勅

天順元年二月十三日

贈江西吉安府知府袁株父袁潤誥命

草堰場

奉天承運皇帝制曰朕聞積厚者流光本淡者末茂  
大凡種德植善之士未有不克昌厥胤者也爾袁潤  
乃江西吉安府知府袁株之父淮海偉人丘樊逸士  
積而能散惠每溥於姻鄰愛而必勞教克成乎子姓  
爰有哲士作守名邦釜養旣違追褒寧可後哉茲特  
贈爾中憲大夫江西吉安府知府匪直表義方之訓  
亦以昭善慶之徵

隆慶元年七月

日

勅掘港守備袁應徽誥命

草堰

勅署指揮僉事袁應徽今特命爾以指揮體行事守  
備石港地方爾宜查照該部題准事理統領原設備  
倭官軍船隻及水陸民竈兵勇無事往來海上巡哨  
有微傳報鄰寨會合截勦其石港拚茶角斜李家堡  
等處場寨備倭指揮千百戶等官悉聽爾管轄爾仍  
聽狼山副總兵節制毋得抗違阻撓致誤海防尤須  
持廉奉法正已率下如或贖貨債事憲典具存決不  
輕貸爾其慎之故勅  
萬曆二十四年五月十六日

著述

明

富安場

漁舍遺響

東臺場

問心集

安豐場

王心齋全集

疏傳合編

崔殷著

鹿野集

崔第著

遺稿

崔三錫著

葛雷著

世德錄

葛天民著

計八卷耿定

心齋則言

二卷程泮

心齋

二卷郡守

王東崖遺集

二卷程泮

大儒族譜

易志

著述

四

十二卷九世孫 遺集 周沂著 周易箋註 心齋第五子 王之恆編輯 王裕著計六

卷 文莊遺集 周崇壽著 陋軒詩 吳野人著 汲古堂集

哭母百詩 爾爾詞 俱沈珩開著

何塚場

豆牕集 朱緯著

梁塚場

文川遺藁 何聯芳著 考槃集 黃鈺著

丁溪場

芙蓉集 德仲遺藁 古今文選 俱王之驥著 空中

片玉 劉永光著

拈茶場

樂菴詩集 繆志道著 南沙詩集 繆貢著 海涯詩集 繆

洧著 糾繆子詩 繆好言著 家藏詩集 繆汝信著 小溪

集 徐佶著

草堰場

白蓉集 袁如驪著 爾爾草 又納遺編 俱袁念巖著

浮玉山人集 袁應祺著 五岳山人集 袁應辰著 六飛

文集 袁乾亨著 霞外雜俎 袁泰著 雍奴集 袁仲子

集 俱袁應黼著 海峰遺藁 董輅著 鶴麓山人集 袁應

嘉著 古愚齋賤言 袁三餘著 士鑒錄 袁孟龍著 古太

極測 定性識仁書 俱袁株著

小海場

癯生集 單一鳳著 任夫行卷 唐宸賡著 燕遊草 唐應

元著 棠棣居焦 單元祉著

碑記

宋

張侯祠堂記 東臺

范仲淹

生祠民報德也制置公本汝穎之奇以文武事朝廷  
為勲臣於四方而嘗戰守秦塞制勝非一招降屬寇  
全活甚衆撫南口以安遠人使北疆以信大義光華  
之命所向凝績天禧中國家以鹽鐵饋運之計重於  
東南命公領之於茲八年公夙夜不解闕政咸舉初  
淮浙之間鹽民告困海利云剝公請賑崇泰楚三郡

亭人歲增課數十萬石興杭海秀三郡鹽場歲入課四十萬石又當蘇秀間太湖漲溢害於甫田公請導入於海歲復租六十萬石白沙郡大江之北有灣數里風波爲險舟楫不利公於是開長蘆西河以濟之又高郵之北漕渠屢決阻我糧道蕩我農畝公於是作隄二百里芻置石限平其增損以均灌漕焉惟茲海陵古有潮堰舊功弗葺驚波洊至醢其稼穡偃其桑梓此邦之人極乎其否公堅請修復厥功橫議置然竟使中廢公又與轉運使胡公再列其狀朝廷可

之仍許兼領是郡以觀厥成起基於天聖五載之秋畢功於六載之春旣而捍其大災蠲其宿負期月之內民之復業歸田者共一千六百戶將歸其租者又三千餘戶撫之育之以簡以愛優優其政治於民心於是請肖公之像以奉於祠期子孫之不忘也秉筆者故作頌焉頌曰我公雄傑經制楚越鑿洞毛髮誠揭日月建利除孽代天工發海陵嗷嗷古防弗牢萬頃良膏歲洵於濤民焉號呼不粒而逃公聞驚心廼按廵察草奏屢陳狂議四過心過金鐵對天不奪宸



斷旣聰宰謀旣同展矣胡公協力諧忠兵民交充興  
防之功盤盤偃偃百里而遠雲矗不散山亘不斷如  
天作限奠萬家產朝以公賢兼於藩宣傷者我全疾  
者我痊逋亡幾千歲復於田公義不爽欲報彌廣建  
牙裂壤將有攸往衆圖畫像以永瞻仰列星之精列  
嶽之靈儀焉停停神焉熒熒居千百年此邦鎮寧旣  
寧旣聚濤莫我苦比比牖戶鱗鱗塲圃而公而暨於  
歌於舞天子穆清諸侯經營民兮樂從穀兮豐盈作  
爲頌聲告於神明

明

三賢堂記

東臺

秦州張

文解元

大賢君子出爲世用也未嘗不以膏澤斯民勲業當  
代爲已任然志有在焉而力或不逮則能相其力而  
成其志者斯亦大賢君子之徒與宋有天下三百年  
光岳所鍾奇才疊出而議者則以范文正公爲稱首  
觀其言曰士當先天下之憂而憂後天下之樂而樂  
此其立志之高固與一世同其休戚而凡所以膏澤  
斯民勲業當代者豈故誇世而要譽也耶仁宗天聖

初公監秦州西溪鹽倉時海堰久廢民苦潮汐良田不可耕稼公具書白發運副使張綸綸奏上以公知興化縣用董修築之役而會大雨雪波濤洶湧役夫散走旋濘而死者百餘人於是羣相謹言以爲堰不可成朝廷遣中使安之將罷其役又詔轉運使胡令儀同公度其可否而令儀嘗宰海陵熟知潮患於是力主公議而不可奪未幾公以憂去綸表請身自董役踰年堰成民卒享其利夫海潮之爲斯患前此之爲守宰者凡歷幾人而公以鹽職之卑了不相係乃

獨身任其責而昔之所謂先憂後樂者言豈妄乎哉當是時公有欲爲之志而無可爲之柄不有張公爲之薦達欲圖斯役難矣役事方殷議欲中輟不有胡公爲之主張又安望其成功哉范公倡之二公和之蓋皆有功於斯堰有惠於吾民報本追遠百世自不可忘者此三賢堂所以建也歷載旣邈堂不可復存巡宰關右李君誠來蒞茲土慨然有重新之志乃按故趾而經營焉中作一堂十有七尺廣長稱之外繚以垣東西南北五十餘丈朴而不華完而孔固塗工

於天順辛巳仲夏落成於明年孟春李君不鄙請文諸石以紀歲月予惟三君子之淡仁霈澤灌溉民心與海波不息仰高山而遵景行者蓋不多見也君能新其廟貌表厥勲德以垂示將來其中之所存固異乎人矣且聞君嘗白州司修繕運鹽河隄百餘里殆聞范公之風而興起者與昔者范公築堰時有張胡二公贊其成而李君之所未成尚有望於後之君子焉併記以俟

三賢祠祀記

東臺

儀真盛

儀太僕寺卿

三賢祠自宋迄今泰州興化諸處多嚴祀之東臺始自嘉靖甲午鹽法御史陳公縞檄運司官爲之然猶明真觀故址爾歲甲辰泰州分司袁君才履任瞻仰以爲未稱謂當改建會侍御雲汀齊公宗道按臨其地謁祠袁君具以請雲汀頷之袁君乃謀於運司高君鸞卜地得觀西南隅爲堂四楹兩廂各四楹爲正門便門者三規制始備皆袁君因事措處未始勞民也時大使吳紹曾以考官教諭謫宦於此預有力焉落成之日謁儀請紀其事儀往爲楚藩臬長紹曾爲

館賓相與五年敬其學行義不容辭夫三賢之祀以  
築捍海堰功也堰始於唐大曆中淮南節度判官李  
承實者以海涵潮病民田稼乃奏請自楚州鹽城直  
抵揚州海陵境築堰以禦之宋初開寶中海陵知州  
王文祐又增修之年久舊功弗葺驚波洊至壞民稼  
稽偃民桑梓民病甚矣仁宗天聖三年范文正公監  
西溪鹽倉白諸發運使張公綸請於通泰海三州之  
境重築之移堰少西壘石固外延袤迤邐如波形不  
與水爭張公以聞且表范公知興化縣發通泰海三

州之民治之會雨雪潮漲兵夫漕死百餘詔遣中使  
按視命轉運使胡公令儀議其可否胡公力請必行  
前議張公亦請身自董役兼領海陵郡詔從之四年  
范公丁母夫人憂去猶移書以堅張公意至六年功  
成自小海寨南至景莊一百八十里於運河置閘納  
潮水以通漕期月之內民復業田者一千六百戶歸  
租者三十餘而張公又請以閒田二十頃詔民墾耕  
以備修築費自是民蒙其利爲張公立祠范公作頌  
及序民又爲范公立祠於鹽場便倉南以公築堰嘗

中一藝論卷之八  
二  
憇於此也後乃並祀張胡范三賢焉夫范公以監倉  
官不避出位兩建築堰之議至宅憂猶不忘移書以  
成厥績乃爲張公作頌片言不及已功張公取善於  
范且奏陟其官及范去乃奏以發運兼領海陵郡躬  
自董役功成猶不忘續修遠慮胡公當役夫百人死  
後橫議囂然乃屹然力主張議是不以小患廢大功  
三賢者誠以生民爲心天下爲度者也東臺與小海  
相望在泰州界內與通海三州之民百世蒙惠宜百  
世祀之也自三賢後在宋有狄公禮沈公起者繼修

在元有詹公上龍者復修在國朝洪武中一修成化  
間御史楊公澄雍公泰正德間御史劉公鐸節修嘉  
靖間御史胡公植及雲汀相繼議修皆以永三賢之  
功救萬民之命者也法得附書

### 楊公堰記

御史楊澄成化己亥出巡海上因見  
運鹽河隄年深傾頽商鹽阻滯私販  
盛行兼之盜賊中途搶掠爲害最甚  
具奏得請築河隄一道會計合用椿  
木四萬三千餘根該銀二千五百餘  
兩葦草七十餘萬束起派本州人夫  
一百九十九里興工于成化十五年  
二月至四月隄成詳見碑記并楊公

奏議

張瓚都御史

君子未嘗不欲加惠於斯民也有其心無其位不足以惠斯民也有其位無其時不足以惠斯民也然則有是心居是位得其時而民被其惠者吾於監察御史楊公見之矣君名澄字憲父蜀之射洪人以名進士拜行人擢今職成化己亥秋奉命來監兩淮鹽課駐節泰州於時泰民王福商人李銘與槩州耆老幾千人相與告曰泰舊有捍海堰宋范文正公監西溪鹽倉時建議所築亘通泰楚三州三州人被其惠而不忘迄今稱曰范公隄惟我泰州之堰延袤一百二

十里西自靈濟廟起迤東直抵西溪巡檢司接連東臺十二鹽課司頻歲隄坏加以淫雨因之以風濤遂致毀私鹺公行盜莫能遏桑田斥鹵穀不可藝豈惟鹽場受患而稼穡被害亦有年矣君聞戚然於中檄揚之知府揚成同知張錫泰州知州陳志覈其實會計財物之費其自區畫者亦多鳩工集材擇州判丁綸如臬知縣向翀暨所屬官之能者分地任功經始於是歲二月越六十日而隄告成隄高七尺廣視高增尺者三樹以萬柳周道如砥民甚宐之君又以

隄西相接魚行莊造水閘土壩各一座又以隄東接  
秦潼鎮亦造水閘土壩各一座壩以蓄水而備旱閘  
以泄水而防澇又爲淺舖一十所命夫往來巡守工  
旣告畢君往視其成居民大悅男婦老幼拜頌塞道  
曰昔堯佐守滑以河決作長隄人號曰陳公隄子瞻  
守杭爲長隄於西湖人號曰蘇公隄今范公之隄沒  
毀久矣幸公續范之功使我秦州之民永賴敢請名  
其隄曰楊公隄君辭遜不許泰之耆老相走淮安行  
臺告予曰加惠捍患必資於仁者信後傳遠必假於

名文楊公之惠大矣敢乞一言用勒之珉石庶使將  
來者知嗣其美而永惠吾民於無窮也噫楊君一舉  
有三善焉海濤以捍民田不至於荒蕪一也國課流  
通私鹺不至於橫行二也運河之水亦賴不泄而漕  
舟不至於稽程三也昔聞揚州運河連歲水涸總漕  
者百倍其勞今楊君一舉而三善備焉不獨惠加乎  
民而已宐乎民號其隄曰楊公隄雖然此正予職分  
內事楊君先我成之信可嘉也夫雖無所請大書以  
傳其美使後世有所考焉固其宐也况其請之專且

繁耶遂記之

山東重修河堰記

東臺

失名

國家嚴邊制聚天下財賦歸之以資餽餉然就其中鹽稅爲最鹽稅起自漢唐界天下產鹽之處有六然就其中兩淮爲最是兩淮鹽政之興廢國賦贏縮係焉兩淮所蒞凡三十場皆有運河輸賦居民亦賴焉十場皆邊海舊海潮漲溢漫民田谷不可藝甚至有漂沒之患故爲堰衛之宋天聖三年發運使張綸及監西溪鹽官范仲淹築捍海隄元延祐五年都水監

河南行省淮東宣衛司開修揚州運河迨我朝尤加意焉及今河漸淤塞少不雨卽涸輸賦者苦之隄日圯壞民窮而國課益縮是知河堰之修與否兩淮鹽政興廢係焉乃今嘉靖乙巳袁郡松岡袁用之判兩淮泰州鹽政百度聿新時有以修河堰請者用之曰吾事也上之大侍御雲汀齊公雲汀可其議發金若干興役是役也用之計工食力計日程功每月必親至地勸懲勤惰而趨事惟恪運河南自海安鎮北抵草堰場暨各場出入河道共二百一十九里濶五尺



濶四丈有奇堰南自草堰北抵五祐場百二十里闕者葺之下者增之墜者廓之高五尺廣視高倍焉而紆謀惟恆經始於乙巳不三月二役胥畢上不糜費下不戕民而規制惟良先主山東貴州試事郡博今謫監鹽稅大使陶悅李弘吳紹會副使黃持衡謝德聰用之咸與共事而用人惟哲昔鹵我田我民弗堪奕奕者隄易危以安昔我陸輓終夜不息爰浚我渠易勞以逸我黍蔚蔚茲亦有秋運舸弗輟以泳以游而澤物之仁溥矣夫澤物之仁用人之哲規制之良

紆謀之恆趨事之恪可以觀裕國之忠矣國賦羸縮係鹽政鹽政興廢係河堰修河堰以裕國則用之是用之亦可以訓後矣因書之爲記

新建泰州東臺察院記

東臺

海門

崔桐

禮部右侍郎

東臺故無察院每御史行部輒就館於分司分司官則退就於鹽課司焉兩淮袁運判才謀諸東臺場使吳紹曾曰東臺實泰州十場中土御史行部道所由出無院以攸躋則旅無寧次事涉苟簡非所以崇等威重國計也且通淮二司各置院而泰州獨無毋乃

於綜理有闕乎亟以建院故請諸御史雲汀齊君君以爲然檄才授其計紹曾督其成於是乎慮事庀材分工董植程功頒直其土方撤故祠以爲址其庸徒召募有方無煩諸場其費出運司公帑八百餘其命日始甲辰仲秋其告成是歲孟冬院中爲公堂後爲寢堂各四楹中爲軒凡二楹左右爲耳房各二十楹前爲次門又前爲大門各四楹袁運判謂雲汀君之奉命而南也各有懋政建院其一也盍記諸乃以碑事謁東州桐桐曰天下事其成與否有幾焉我國朝

鹽課司之設餘百七十年矣而院事尚莫之講何哉上焉者豈無志焉而下不足以承之非幾也下焉者非無謀焉而上弗之可非幾也雲汀君以務內之學紆彪外之治本之以純篤敷之以激揚勵政勤民虛已體物奉使之賢者也運判能足以周旋紹曾隨牒寄跡不負科名亦一時之良也是故上有志焉下克承之克承則志同志同則事集是之謂和會下有謀焉上弗鄙之弗鄙則謀獲謀獲則事成是之謂嘉逢余所謂有幾焉者非耶觀一院之作而幾於上下交

相成則天下之事可以偏才理耶吾今乃知雲汀君之政豈曰著在淮海雖達之天下可也雲汀君遼東人諱宗道別號雲汀云

分司杏村聞人公去思碑

儀真盛儀  
大僕寺卿

天下惟理財以得人心使之日久而不忘爲最難昔管仲謀興鹽筴卒成齊之衰劉晏精於鹽法而身亦不免徒知專利故也然理財爲國家重務豈必盡捐之而後可以得人心也哉亦爲先知成民而已矣大率產鹽之處民習煎煉俗尚陋惡多知利而鮮知禮故

任是職者恆以府怨爲難焉我國家於兩淮設都轉運鹽使司爲分司者三曰通州曰泰州曰淮安督理鹽賦以濟漕壅厥任重且艱矣正德歲甲戌杏村公以兩浙名士來判泰州分司事獨以起弊維風爲治當時翕然從之迄今三十餘年且追頌不衰非其先成民以得人心能若是乎蓋公之蒞政也以愛民爲先而尤重於勸學撫綏商竈勤恤國課外特申請所司於各場置義塾選一人爲教讀以董子弟業歲月考其成功重興范文正公祠於小海表揚前哲以勵

仰止而又多所著作親爲倡道焉由是受業者日益衆雖頑鈍罔不知禮義且任廉委能修築海隄而民受其利戮豪強傅民望罪白民婦王氏冤而人服其明斷境內肅然不數歲政平訟理教化修明俗尚文雅課獨爲最故文章政事推重當道諸分司亦從而興起焉然衆方仰其有爲公竟以賢勞卒於官永嘉羅峰張公與公爲年兄弟甚善雅重公德學及登相位欲大用公而不可得惜哉噫公之位雖不滿其德然沒世而人猶思報之公亦可謂不朽矣邇來聖天

子軫念兩淮財賦之艱而難其任朝議公之姪太史越望公賢嘉靖丙午春以文章之暇出佐鹽政乃不率公之故而益新之矢心清白務崇寬大催征不擾賑恤以時輒條陳便宜於鹽司以利商竈故人被其德莫不勸於供課而不忍爲奸嘗總領三司事無大小必一時遣決公餘卽進諸生於庭講明正學士皆彬彬益惇文行侍御劉公謝公陳公重加旌獎首屬薦剡是固學道愛人之明驗抑可以見世篤爲國爲民之義矣則泰之人頌今之新政而思公之遺愛者

又當何如耶昔董仲舒相江都惟正諡明道而無計  
功謀利之私故萬世瞻仰二公夙明正學而催科撫  
字陋晏子不爲蓋淡得董子之心民永思之空也不  
然則嚴簿書急期會者當時非無赫赫之威而今安  
在哉泰之耆老總竈陸穀曹潤姜松等數百人重於  
感德而思不忍釋迺來告予曰吾輩濱海之人也共  
受聞人怙冒恩敢請一言以識不朽予爲聞人世交  
辱知於杏村公叔氏督學侍御北江公因知公之賢  
今又與越望君稔愛惡乎辭杏村公世籍餘姚寓錢

塘登弘治戊午鄉薦諱韶字舜和太史公諱惠行字  
元科越望嘉靖丁酉魁省試中戊戌甲榜前尚寶司  
司丞兼翰林院五經博士內閣掌誥勅校錄國史茲  
并其事書於石因銘之曰全浙毓秀賢哲挺生觀風  
淮海嵯政以平衛我民居教我子弟鋤強雪冤厥德  
波被胡天不憖莫究所施維太史氏克維令儀政事  
文學後先一轍恩溢惠流有光前烈世沐怙冒民曰  
休哉予銘茲石永永方來

運副愚齋楚公去思碑

東臺

興化

解宗

兵部郎中

隆慶改元越三禩愚齋楚公任兩淮運副署中十場  
鹽事蹇績懋著奏最天府竈民咸牽車臥轍不忍一  
釋去鄉之耆彥唐臣曹滄生員李祥素服孔孟之學  
濬心齋之流以風海鄉僉悼失仁人也經度旣備備  
役惟時會計均節鑿石勒功以垂永久仁哉楚公胡  
爲得人心若此哉公名孔生藉孕曹州少抱經濟發  
巍科前令昌黎政聲赫奕尋轉茲任來署中十場篆  
中十場課甲兩淮實西北邊儲前遭島寇不逞民生  
凋憊竈蕩丁逋公甚用側遂多方招捩歸附口漸蜂

屯生齒旣繁課賦均輸發奸擿伏電察如神獄無留  
而民無仇情更立鄉約以淑民心以端士習民知終  
事之義士服禮義之方瀕海瀉鹵之地煥然文明之  
鄉楚公之治行懋矣哉河中借寇徵車屬路惟垂頌  
聲卽石是銘銘曰皇帝建極分任宣力惇德允元克  
稱厥職惟我楚公其儀不忒視茲兩淮運賦惟急用  
實邊備以寧西北公典茲政匪舒匪棘外勤修繕是  
戒是剔內撫流移日增歲益惟正之供有倫有則不  
下損民不上負國躬敷教典尤勤訓迪聽訟得平民

無冤抑止是海邦膚功奏績憶自飛舄來蒞茲土威  
愛克濟吏民安堵瞻如嚴親依如慈母曰朴曰材公  
之似續願奪青紫踵此芳躅復巡海濱用緜厥德吾  
人永依世祀無奕

分運海門周公去思碑

東臺

會稽

羅萬化

吏部侍郎

夫士胡可以弗學哉修身理性匪學弗明服官蒞政  
匪學弗達安民附衆匪學弗親學也者所以兼成人  
已而通天下之感者也古人學優而仕仕優而學無  
隱無顯無遠無近無崇無卑無大無小無一而可廢

學也乃今譚者又往往諱言學何耶余越自王文成  
公倡致良知之學力洗支離汗漫之痼傳習一錄所  
以發揮性靈開示顓蒙體之身心驗之政事炳炳朗  
朗師法具在顧高者馳騫於玄虛而潰真修卑者借  
騰於口說而忘實踐流弊則然豈學之過哉海門周  
君稟篤實之資敦志道之願慨然有慕於學而以致  
良知爲宗常與張太史陽和往來訂證於稽山鏡水  
之間忻然自得也余時心儀君賢未獲交萬曆丁丑  
君成進士官南京權稅蕪關時當江陵操切之政君

以課不登被劾落職家居數年無幾微愠色庚寅起  
補判淮揚運司分治東臺地濱海饒魚鹽之利其民  
質朴而鮮心學之士又無名山大川可娛悅其耳目  
故士由甲科謫者率無聊不平悠悠待遷以去由他  
途者則侵牟餘羨輒以墨敗間稱能盡職者不過取  
盈鹽課已耳其於民生教化奚暇知哉君至憮然曰  
仕不必擇官政不必擇民米鹽瑣屑詎非吾事剛柔  
雜揉誰非吾徒慢而視之忽而外之豈學也哉矧以  
東臺之陋而值歲大禘之後流離強半吾胞與之念

謂何獨可受若直怠若事而秦越若人乎於是首下  
招集之令還旣散之民歸之本業而間爲捐俸入斥  
羨餘建書院延章縫之士日夕講學其中又勅十社  
學以淑其幼之秀者其他表揚節孝申布鄉約頒行  
家禮凡可以厚民風正民俗者孜孜汲汲不啻慈父  
之於赤子故視政未及期而教化大行民之戴君亦  
不啻赤子之於慈父也會擢當行東臺之民無計畱  
周君則相與謀所以志思君者場宰大章余外弟也  
因乞余文紀其實余聞而嘉周君之善學也昔文成



公證悟良知實爲龍場之謫卒之應變定傾勲勒旂  
常爲國宗臣者學問之功大矣今周君之學本之文  
成而謫居東臺觀所以率先教化興起斯文者不遽  
廬其官不鄙俚其俗一日居位卽一日盡職宛然有  
委吏乘田之意焉謂善學文成者非與夫良知之用  
無間可息致知之學無微可忽要之於真恪實踐而  
不爲玄譚勸說者則余於周君東臺之治見之民之  
思君其在斯乎君諱汝登字繼原別號海門越之嵎  
人也

分司楊公裁革供應德政碑

東臺

李思誠

興化人  
編修

臺御史歲一巡行海上經費在籍者舊有成額矣分  
運公什一在揚什九在場重國課也先是諸凡供應  
取給於下東何二場受弊久矣風俗軌襲誰憫不均  
之役乎楊公蒞治軫念百姓疾苦慨然太息曰嗟乎  
夫上愛奢華民亦念其家此誰非吾赤子膏脂而朘  
削之乎矧儉約吾性也澹泊吾素也何復疲困吾赤  
子爲且彼分署通州者非吾之一體乎彼第於經費  
中十取一焉業有成議援此爲例可矣遂聞之臺御

史臺御史如議則下檄嘉與百姓更始供應交際等項取之十場經費之十一其餘一切悉罷之不以勞苦百姓永爲遵守百姓鼓舞稱便以手加額曰此我公百世之德哉願勒之石以垂不朽用是請記於余余因之有感矣世之瘠民肥已秦越其民者豈少也乃公能節已之費而不忍竭民之膏倘所稱節用愛人者非耶蓋公負敏決才而行之以慈愛之心其他德政炳炳麟麟舉不書書此爲不易之章程者是爲記公名維清別號中麓中丙子鄉試雲南昆明人

分運九湖葉公遺愛碑記

東臺

崔桐

海門人禮部右侍郎

兩淮都轉運鹽使司分判九湖葉公守泰州分司甫半載以賢能懋著擢鳳陽府別駕啓行日遮送者塞墟市有擁車號呼者有嗟滄而畱靴者有念公廉貧懷金伺途而相貽者公固拒弗納衆歎惋相聚曰曷以揚公美報公德而永吾思於是屬吏耆逸唐臣曹滄馬瑄夏穉輩相率而走告於予遂爲之記曰公名龍字乾甫江西南昌人癸丑進士以禮部儀冑郎授泰州分司夫東臺諸場民土素稱繁沃頻年倭奴入

寇民荷戈而耕偵烽而憩土兵捍衛客兵供餉甚殷  
公蒞任凡於事弗急者蠲之費不經者省之務在安  
養休息民欣欣然若不經兵燹者先鄰郡倅承上司  
風旨來按茲土總催獲雜犯重譴者數百人公至覽  
牘奮然曰總催皆亭戶右姓非悖裕厚善者不足以  
率人撫拾小愆乃抵擬古之君子不輕抵人以死况  
無故而加之名耶可憫也遂人爲之辨請於上司上  
司允之諸亭戶亦爲之加額竈民納鹽於場司場司  
存積以待支分守者慮其不實每挽輿檢覈嚴爲丈

量竈民因而獲罪贖金或私囊橐公則委蛇自得未  
嘗以不實疑民一時不勞於迎送不煩於供饋而民  
無抵法者巡鹽柱史出按諸司場凡鹽課以五分爲  
及額公所轄上簿或止二分公曰某場三分以上皆  
重懲吾豈可以二分報亟命更其簿爲四分有餘屬  
吏咸以覈實不應其簿更重罪莫追堅以前簿上公  
曰吾在茲胡至是耶遂更之柱史未至其境竈民感  
公恩輸納日至課皆及公所議數公雅性簡朴敦尚  
禮教待士大夫謙虛不自尚雖屬吏入見公謁畢亦

降階延訪謀猷善者嘉賞不已施政革弊沉思累日  
必有利於民而後行執守毅然權貴撓之弗懼也蒞  
數月政事修舉利洽上下聲譽揚溢朝廷以畱都重  
地非公莫守乃擢公輔之竈民畱之不得則相與羣  
歌於途曰美矣海陵花有葉增顏色葉濃花更鮮葉  
稀花寂寂蜂不採花鳳採葉鳳攜葉去花搖曳又曰  
葉公胡來遲葉公胡去早天下盡王民胡爲使我不  
常飽傳聞繼者賢奕葉相扶民不老此予所聞於四  
君子者其槩如此若其恩洽於民心者未可以辭述

也夫公胡然而得此也哉德之懋而云之粹也前代  
立碑頌德自賈敦熙始後雖竊美以侈觀撫善以終  
陋雖勒石日多君子不淡以爲愧者幾希嗚呼感恩  
於久任者難也而戴德於半載者尤其難見於歌謠  
而頌功者難也勒於金石而永世者不難之難哉葉  
公有之此葉公爲可淡嘉而四君子輩相與不忘公  
如此是又不多見也是爲記

鹽院謝公重修范公隄記

東臺

郭子章

泰州人兵部侍郎

古之論水者海爲大其次江河而利患叅半江河之

水或以佐耕或以通漕白公引涇嚴安遵洛而農利  
宇公疏流韋堅堰渭而漕利至瓠子興歌閭磳爲河  
而河之患貽於閭海之利或以煮鹺亦或以通漕夙  
沙煮海管子富齊而鹽利元末張朱海輸明初因之  
而漕利至海濤齧隄冒民畝畝而海之患貽於田予  
讀河渠書溝洫志等傳所以防河患者無所不修而  
防海之計未之前聞及讀李燾通鑑長編泰州海堰  
久廢沿海潮水浸淫城下田土斥鹵亦不稼穡范文  
正公監西溪鹽倉上書運司張公綸謂當移隄勢而

西稍避其衝仍壘石以固其外迤邐如波不與水爭  
乃築捍海隄於泰通海三州境以衛民田張聞於朝  
以公爲興化令董斯役發三州夫治之旣成民享其  
利興化民往往以范爲姓又名范公隄由宋而元詹  
士龍爲興化宰發九郡夫并力築之歷明歲久飛澇  
相礮激勢相切維揚之田半齧於鹵淺闢庸種田家  
作苦萬曆乙卯粵潮惠萊謝君中吉以名柱史奉天  
子命巡鹽淮揚行役海上巡行范隄睹洪濤瀾汗萬  
里無際長波濬筵迤延兩郡乃檄觀察豐城熊君周

遭詳視畫地分工命掘港守備管大藩督理浹月告  
成會計費金三千兩有奇費石二千條有奇費畚鍤  
夫十萬工有奇起自呂四場訖於廟灣場合之共八  
百里有奇夫巨壑之濱宛若長虹鵬溟鮫室之畔鬱  
焉聚窟隄以內輕土弱土之野一易再易田直庇句  
庇利發之畦有遂有徑有溝有畛有澗有澮有道有  
川有路卽有洪濤豈能飛衝卽有苦水豈能闌入易  
斥鹵之鄉盡爲原隰護礪薄之地歲得耕獲微獨文  
正千載之遺烈未墜於地卽天子南顧維揚之蒼赤

盡登於岸矣柱史君不遠數千里遣使函書請記其  
事於石夫猶之水也河之水也奚以甘海之水奚以  
苦也嘗近取諸身吾身一小天地也腎氣沉爲前溺  
聚溺煮爲丹石味勝於鹽口水上升其甘如飴天地  
之水人身之血升者甘沉者苦類皆如是微獨海也  
河爲海支而亢於海海爲百谷王而庠於河故河水  
爲田福海水爲田蓄無足異者能福吾田者吾引之  
入能災吾田者吾禦之出此范公隄所爲築於宋而  
謝柱史所爲支其壞其功埒矣中吉昔與予講學潮

陽秀才時以希文自期今爲朝廷耳目爲禁中頗牧  
予期中吉寧止復一捍海隄已耶柱史名正蒙字子  
聖潮州惠萊人觀察名尚文字益中江西豐城人  
分運海門周公遺愛祠記東臺 王應鍾西本  
兩淮中十分運越中周公理鹺事期月以萬曆辛卯  
之季春奉召北上何埠父老羣子弟而攀臥之甚至  
涕泗不舍去者倚嗟公何以得此於民哉嘗謂凄然  
之秋百卉具腓造物之功至是而顯矣然天地以好  
生爲德滋息於始隱而不暴不有熏然之陽春乎冲

融和煦被萬物而不施草木夭喬亦被之而不德此  
化育之流行而治功之準則也名士之急功利喜夸  
詐者多樹恩威非不致人之驩虞而去後漫無所述  
惟公優游以政恬淡寡營雖地僻事繁一以無事鎮  
靜之民或訟公從容開諭不私民一緡不枉民一事  
法有不貸者薄責示儆而已鹽賦多積逋許以價代  
緩徵流民復業者接踵競相輸課樂利海濱立鄉約  
頒禮圖俾民遵奉聖諭古典周諮仁賢重建社學置  
店田代貧竈修贄給巾服飭子弟威儀構泰東書院

與四方耆英碩士及童冠輩講學論文聲歌教禮致祭於心齋王先生祠下見其頽圯捐俸金修葺爲置產以遺利後人再求門下之賢士於縉紳韋布中得七人爲從祀王公祠表揚其墓瀕行發贖銀三十數令備社學圖書何慤慤厚也大都公平生廉靜自守蒞任以來或行部或公出閭閻若不相聞而門無遺賢庭無遺政鳴琴臥閣有懸魚畱犢四知一錢之風旣行父老率其爲生祠以禧公請碑記之永厥德也爲嗟今之何埠其古之曲阜乎故史傳歷代循良者

非有矯異之績亦爲漸摩之淡澁肌淪髓猶所謂薰然之陽春矣斯爲政者固不自德而民亦忘其德然去後人心卒不之忘此周公生祠之立也不可以徵民情世道耶祠宇凡三楹兩廡門垣整飭而綠槐植前其名棠寇栢尤爲公輔之兆云公名汝登字繼元別號海門浙江嵯縣人萬曆丁丑科進士祠成而記之以備觀風者採焉因系之詞曰范堤之西曰何埠兮地僻年饑民卒流移惟公之來拯瘼恤災省刑散財斃獨是哀惟公之循均役弛征積逋之民復業全



生惟公之良施政多方教化用章正學闡揚今公之  
去凌霄騰翥思不復睹滄泗如雨九龍溪東屹立祠  
宮仰止高風山水攸同

侍御謝公鹽摯記

泰州劉弘宇戶部主政

我國家以鹽筴之利籌用經邊其課額之盛無過兩  
淮矣然其所以足是課者非取辦於神運鬼輸實熬  
波之民胼手胝足而爲之也使其支買無度價值弗  
平則踊賤之害亭戶先受之亭戶受其害必將轉徙  
四方遺課莫辦而其害則國受之矣祖宗朝商支皆

有定制相沿既久法翫弊叢奸獪攘利樣桶漫無定  
制鹽值一任增損然海濱曾窳俯仰皆賴鹽利漁獵  
之餘數口之家且有不能供饘粥者何以望其足課  
乎侍御謝公按部茲土持法平允鹽政聿修獨鹽桶  
之弊無有敢言者時何塚場竈金價淡念亭民久當  
其害奮然陳情於公公乃密爲體訪盡得其情憮然  
歎曰非價言亭民何時獲甦國課何由以足乃行分  
運尹公希孔通融酌議以慎以公乃發贖鍰七百餘  
金遍諭兩淮諸場各置銅樣桶一張每張重二百五

斤容一石三斗二升支買一如其度雖有奸宄不能  
爲害矣於是商守其制竈安其常國享其利垂之永  
永誰復敢姦則公之流澤寧有旣耶由是亭戶安鹽  
課足邊儲有藉國用不虧咸公有以培其本也不恤  
利害而條陳其情者則義竈金價之力也因並及之  
公諱正蒙廣東潮州府之萊惠人性剛介饒風力以  
鄉進士擢侍御史民感其惠走丐余言以永貞璣因  
次第而爲記

泰州分司題名記

徐光國 分司

不佞光國載觀唐史至以人爲鑒可知得失之說誠  
確論也迨溫公諫院題名出而巋然堅珉有箴規之  
義焉若是乎題名之不可已也在昔管晏以鹽筴著  
而天下鹽官轉運有六兩淮居一焉兩淮運判若而  
人泰州分司居一焉載在鹽政志班班足按我明正  
德十五年始自御史鄭公氣請令泰州分司度地之  
中住劄東臺統轄富安等中十鹽場催煎督課稽場  
司之贖清詰竈丁之勤惰使完課之錢物不費於官  
府煎鹽之丁力不疲於道路催科撫字並行不悖分

篆之益竈也多且渥矣不佞光國產籍三衢今上天  
啓二年由南光祿視篆茲土三閱春秋竊嘗慨之前  
此三載中轉遷代庖而去者十有一人不佞光國猶  
株守一局自知於竈一無少裨而人物山川差可縷  
數淡歎文獻無徵爰聘雋賢咨訪纂輯稍稱信書獨  
本司題名尚爾缺典先是余鄉義烏蔣君德望有意  
採石去而未果似有待也噫嘻其人存則其政舉今  
不存之後未必有存之者矣是舉也迂而視之則不  
暇舉避而遜之則不能舉况乎離政治革之可否而

人之賢否與俱巨石載瞻某爲過某爲不及某爲芳  
濁之可追某爲傾覆之可戒因時以論事因事以求  
人觸目儆心余何爲不師其所可法而鑒其所不可  
法哉若是乎題名之不可已也今去正德百有六年  
其巡歷而德政最著分篆而紀載僅存積官而宦蹟  
可考得若干人鐫次鄉貫姓字於石豎之廳事之堂  
命之曰兩淮運判分司題名記

清

安豐場挑濬竈河碑記

康熙九年

汪兆璋分運

東陶舊有竈河一道自場迤東以達斥鹵沿河二百餘里埤蕩相望鹽藉舟楫轉運無車脚擔載之勞商竈稱便自竈河淤塞洎今百年故道漸以湮沒埤棚悉廢彌望惟寒烟白草而已間有議疏濬者悉以工費浩繁究成築舍康熙乙巳秋適有風潮之變竈多徙亡流離載道場諸生吳道昌鄉耆袁汝章總竈徐我遇等以荒政有興治工作全活飢民一節兩有攸利因條議公籲前任分曹 郭公轉詳 督轆使者黃公 運道朱公俱報可又計挑濬工費趣辦爲艱

請預借商課陸續扣鹽完償二十除一日登官簿月繳甘結嚴其稽核出入無滋破冒議既定有綱商鄭永成爲之倡衆商蔣方成萬祥等咸力襄盛舉貸課本凡一萬一千有奇計濬五竈倉河支流經委鈎盤曲折共二百四十三里有餘量地加工無曠日給餼稱事無糜費寬二丈四尺深一尋無致淺隘其間度長潔大拮据經營惟鄭商是賴時值雨雪連陰急發粟五百石以賚飢餒亦惟鄭商是賑經始於是年冬告成於明年春爲期未及半載蓋以好義集緝有衆

商指顧勤勞首出多金有鄭商以致四方飢民重繭  
錯趾麋集從事工成甚速宐也竈河故道旣濬兩岸  
埽棚以次復整竈無廢業遠近饑民亦以力役得食  
所活生命無算而羣竈德商不置因恪遵原議扣鹽  
以完前貸由丙午春至巳酉夏凡四載僅完所借商  
本八千二百十九兩有奇仍欠商課二千八百十六  
兩有奇衆商復念水旱頻仍環庭公稟願行捐助以  
全始終而捐資最多者無如鄭商其事尤不可泯予  
日丁未孟夏承乏分鹺旣喜諸生耆竈之悉心經紀

而樂觀厥成且旌勞獎義固官茲土者責也因遵  
鹽憲批詳勒石河干以垂永久俾享其利者無忘所  
自而衿竈之倡論急公諸商之樂施好義咸藉是以  
不朽也夫是爲記

徵分運汪公惠政詩歌啓

楊大經

南康人

蓋聞枯疇雨潤百里立霑黍穀春回千村俱煖是以  
仁聲馳布非惟報政之期義問昭宣方慰蘇氓之望  
芾翁汪老先生毓秀黃山挺生浙水朱輪彤轂太原  
之九世競榮綠緌緋魚華陰之一門盡貴家聲丕振

世德作求爰奮迹於烹鮮旬宣海嶠遂勒功於製錦  
駐節邗津固已譽隆鼎鉉望重鹽梅者矣銅符初縮  
便騰尺水之波墨綬纔懸卽皎中天之日剔弊除姦  
初非旋踵蕩瑕滌穢曾不崇朝矢歛泉以示潔秋月  
一簾慕倒屣以崇謙春風滿座德深到任數月人不  
忍欺孔奮視事期年囊無自潤所由信著羣藩慶流  
百里者也始焉旱魃爲災旣而蜚蝗肆毒顛天而祝  
不異返風建壇以祈何殊暎雨革火耗之陋規澤旣  
加於任土禁苞苴之弊習利復被於行商洪波連四

載請賑請蠲每下長沙之淚流移將萬口議撫議恤  
時披鄭俠之圖係甲法嚴而私販歛踪鄉約教行而  
善良接迹蒞事精勤雖文案如山而庭無畱贖折獄  
明允卽行藏如蟻而物罔遁情項之飢民嘯聚馴致  
赤子弄兵設方略而殲厥渠魁一方以靖用招徠而  
定其餘孽萬井蒙安故能里無鳴柝戶不夜閉白馬  
紅巾之賊魂斷草間黃龍青雀之舫冰消海上用是  
游民豪族咸畏董宣因之猾吏奸胥羣驚尹賞况乎  
貪泉不飲夙號清廉蒲杖爲鞭同稱仁厚惠浹窮簷

中一坊詩卷之八  
集鴻雁於中渚法警積社走爰免於遐陬此則流通  
渤澥莫罄恩波山亘恆華難方峻德者也秦郡紳衿  
耆舊靡不謹呼商竈黔黎胥爲踴躍戴高厚以難酬  
愧涓埃之莫報襦袴麥岐之頌固已興自前朝甑塵  
魚釜之歌豈可缺於今日旣憩名伯之棠空詠萊公  
之栢須鐫金石幸惠璆琳謹啓

重修元明觀碑記

梁堦

汪兆璋 分運

神道設教由來久矣北極真武爲道家之所崇奉位  
法天之斗故廟多在北北方水水色黑故其號爲玄  
職主於鎮魔伏邪驅除蕩滌故有武之號而其名之  
爲上帝則尊稱之辭也梁堦舊有廟相傳創始於唐  
宋入明一修於宣德五年再修於萬曆十年皆有碑  
記其年月與修造之人迄今百餘年興廢不常原古  
人立廟之意要在於使人入廟思敬伏自心之邪鎮  
自心之魔勇猛振刷而同臻於善也云爾抑於此又

中十場詩卷之八  
有說焉吾嘗遊行寓內過都歷國觀所爲州郡縣邑  
其人民聚族而處比屋而居雲屯鱗集類皆有高山  
大陵崗巒阜島環拱抱揖以壯其氣勢至於平原廣  
野一望茫然則必有浮屠老子之宮層樓飛觀屹立  
鼎峙巍然爲一方之鎮如人之一身高冠峩峩先正  
其爲元首而後黼黻圭璋金玉藻績稱其爲章服康  
熙丁未予謁選得分運兩淮之泰州所隸十區地瀕  
海滋每歲夏秋例行部各屬催課之餘因之以觀風  
問俗進父老子弟慰勞而敦勉之至南梁見衢北有

廟就視其門垣殿廡悉傾頽圯塌其中之神像風雨  
淋漓大半爲鳥鼠蟲蟻之所巢穴鐘鼓荒涼香燈闕  
寂過之者率掉臂不顧詢之士人知爲北極元明觀  
也越明年再過其地則翬飛鳥翼煥然改觀蓋昔之  
隳而敗者歸如陷而缺者整如剝而蝕者完如側而  
斜朽而腐者蠹如截如比如籀如丹蘄聖壇映照輝  
煌而神之棲其中者金碧爛然過而望者莫不爲肅  
容起敬問誰實舉此則徽商方君鴻逵所捐貲而成  
也予嘗接晤方君其爲人渾樸篤厚平居力行善事



中一 藝言 卷之八  
孳孳不怠如施榘賑藥修橋梁平衢路一切濟人利物之事每歲無虛日又鉞鏃功過格廣諸同志以遂其與人爲善之懷今復有是舉費金錢千伍百緡有奇吾未考真武何神與其發跡出處之所自大都從古來建廟於此一方意欲此紘紘總總者虔禱敬奉昭事明禋庶神明感格風雨以時災禳不作以福此一方之人今任其陵遲廢墜神無所憑依而人無所致其誠敬顧何從得人之崇信而鼓舞其同臻於善哉方君不惜貲費而成之則既有以表一方之雄鎮

而復有以引斯人於善其有造於此一方多矣工既竣其里之人德方君謂予實宦此地言可以傳信乞予文爲記予曰方君之爲此非市名而要譽也奚記爲衆進曰事無有往而不來物無有完而不毀方君雖不尸其功書其事以勸來者其可焉予曰善遂書以畀之俾歸而勒諸石

淮南中十場誌卷之九

碑記

明

楚公濬富安西便倉運河碑記

富安

何堅

射陽人

明興建官設長貳羣蒞民事司主國計兩淮歲入當江南之賦厥責重矣非兼才莫任楚公之陟運副也以知昌黎有異政宰衡上其績天子若曰方今之務惟邊是亟亦惟才是擢昌黎令可任命其請公至嚴課程稽積蠹明慎出納而約劑之憲臣曰才檄署司

事值歲不穰首請出帑金賑之全活者衆諸場草蕩  
丁二百畝水鄉僅獲半給頻年爭訟公歷諸蕩所哀  
其太甚廉新灘均其予竈始服丁有登耗課因之胥  
吏務增損爲殫力清覈始均矣泰州分司隸場十首  
富安西便倉者富安之要區也舊有運河自倉距曹  
家壩四十里名爲鐵索河會於鱖魚港通於三汊達  
於二洋以入於海運漕載薪商竈便之顧亢陽爲厲  
積淤成陸渠不可舟比霖霽驟發漫延奔潰無復故  
道潮湧輒逾堰而西瀉鹵於田卽沃土無復有秋歷

洪武迄茲未有疏濬之者竈民崔芬輩以公多興革  
有惠政懇請之公憮然曰是河關係於國計豈尠哉  
河不濬則旱澇無備民艱食歲額莫辦邊儲何由充  
乎嗾民失業商亦罔資矣於是請於侍御孫公出帑  
費充之屬公經略復分委安豐副使張潭董之擇殷  
實而材者襄其役計工授直得河六千九百九十一  
丈給銀一千五百二十兩有奇工始丁卯九月十九  
日竣於十二月十五日是役也鳩工集徒樂趣不亟  
三閱月河用底績旣浚且廣紆流汪濊水由故道漑

不逾防旱不涇涸竈利於煎商利於運以故積疲者  
甦流移者復卽富安素甲諸場茲大起鹽筴非復故  
壤於是表貞節崇孝友郁然文蔚矣孰非公之遺澤  
乎昔范希文築隄瀕海外禦溢鹵內養嘉禾功施後  
世人競祀之苟是時於諸要津增閘設涵由泰距通  
若滄安姜堰諸壩比諸場海河埤堰處所易壩以閘  
司其啓閉時其蓄洩於河隄一帶多建平水閘徹其  
窪集導其下流之滙俾漕渠五湖潢潦率以次由閘  
漸洩於海卽遇潮不滯怒濤不作湖險可殺運艘可

通河隄永不衝決瀕湖上下萑葦之藪悉變稻粱之  
區得腴田萬萬頃不加賦而民足誠希文未究之志  
今復重墾於公也且公昔尹昌黎興除振厲已繫去  
息語具孫太史碑記茲竈民惠德復徵文立石以識  
不忘可以規人心向背之公也苟舉是議因民心以  
告於憲臣未有不傾聽之者獲蠲積羨成此萬世永  
賴之業策勲社稷而勒銘彝鼎當與希文媲美崇階  
峻陟烏足以盡公哉故曰於公有厚望也公名孔生  
字夢徵號愚齋山東曹州人起家己酉鄉進士云予

方養疴湖上懸車謝客乃崔芬輩復相率徵予言日  
來視予越數閱月不置可以知公之得民深也乃忘  
寡昧爲循良執役復繫之以詞詞曰無臯南望蒲昌  
巨澤爰煮厥水誕茲民食遐陬通貿飛輓是易富安  
勝區埒於劇邑蜿蜒海河旣湮且塞維我司副溘然  
興惻懇告憲臣出茲羨積工始不亟倏忽報績瞻彼  
行潦猶瀆之委灑渺漕渠猶河之源希文倡之冀公  
續焉邁德懋業億萬斯年

重濬運河記

安豐

闕名

天下六運司惟兩淮運司爲雄治蒞三分司惟泰州  
分司爲最而安豐又泰州之鉅場也商竈淵藪鹽利  
甲東南之富我國家國用所需邊餉所賴半出於茲  
歲嘉靖甲辰至乙巳夏旱魃爲虐赤地千里河道湮  
涸水利不通而商民病焉凡鹽引之赴掣食貨之貿  
易率事輓輓而嗷嗷之民身無完衣面有菜色者又  
且在道矣分司運判分宐袁君才實憂之會翼城商  
民趙栢等具以前事訴之於兩淮巡轅侍御廣寧齊  
公宗道公曰爾實先得我心者也遂下令於運司而

運司永清高君鸞與運判君會計其多寡之數出庫藏之儲以給其費簡屬官之能者分督其事則安豐大使謫官李弘總會其數副使葉璉實專督理復委拚茶場副使王鈇以副之諸君皆協心從事相舊址經財費具畚鍤募流移之民因以就食每一丈其橫三丈徑一丈深三尺人各給工銀四錢有奇商民若趙栢等尚義復助其弗給總竈若丁櫛等協勞以相其成功始於乙巳三月上旬迄於五月將終其河舊名風井運河南抵富安北抵梁塚西抵青蒲殆數十

里長八千一百八十六丈計工值銀三千七十六兩有奇嗚呼斯河之濬流派洪遠圩岸曲濶固水源爲之縣長財貨爲之滙聚匪特以利濟商民而茲場富庶又倍於昔矣偉哉諸君之功也河成值侍御公復命北上運判君宅憂南歸大使新喻胡以新任至場僉議立石以紀之而副使葉璉復介生員樊潔于淵來徵余文爲記余恆見有官守者多苟且稱欲繭絲是務求悉心民社爲計經久如諸君者少也故特書之以告後之人時繼而濬之毋致於塞共圖利濟商

中一坊記 卷之九  
五  
竈於無窮也凡有勞於河道者附刻於碑陰以志歲月云

廣容橋記

安豐

廣陵

林正茂

布政

二氣呼吸霄壤間而海之潮汐生焉間者乘風洶湧奔走如山物之所攪罔不摧敗使無所捍禦則桑麻五百里之區溢而爲斥鹵不毛之地矣先正范文正公所由以築隄也垣亘千里其東也抵海僅百里許西抵泰州治所亦如之東以興鹽利西以事稼穡其間若無橋梁壩閘以鍵水之蓄洩又何以備旱澇哉

此橋與閘不容以不建也昔在宋元民物未繁居是者寡庶事粗略不過徒杠而已爾殆至我明邛極民日益庶政日益舉垂至正統十四年東洶善士王文貴覩徒杠之地壞由是廣市石材易小爲大下構圈門上衛欄楯所謂輿梁者是已殊異於昔之陋也奈何歲久而頽王氏公美又從而修之時成化六年也迄今甫四十餘年復見傾圮義官王尚端與衆謀曰斯橋何爲而速壞也蓋由上無定閘以節其水性下無橋梁以接其順流故致奔湍衝激回瀾旋於橋之

左右此其所以弗堅也于是捐已貲而鼎新之制度  
之工規模之壯俱加於舊上流則增以石閘下流則  
鑿以直渠蓋有得乎治水之良法焉衆請勒碑以示  
後而謁文於予茲橋之建所惠者大而河閘之創又  
有垂於永固可紀也矧文貴作之而厥嗣公美述之  
厥姪尚端又繼之王氏奕葉之輝功德之相望蓋實  
有可嘉者焉

重修三賢祠記

梁燦

興化

李思誠

禮部左侍郎

熬波富國中十爲甲而中十之不狎於蛟龍者則隄

爲之也隄之經營實始於有宋范文正公仲淹張文  
靖公綸胡文定公令儀梁界一隅恩同於九是以歷  
宋越元莫不同舌而賢之立其主於廣旃額之曰三  
賢牲俎之典舉於春秋比者土木崩摧幾爲蓁莽無  
論几筵蕭然詰以三賢姓氏而有杳不知者矣朝烟  
暮雨弔古興悲士庶謀所以新之而未有任之者也  
會分運徐公臥治十屬仁風相扇海無衝波乃欲纂  
修志書取徵文獻於是禮聘孝廉魏生文學王生諮  
訪採輯修廢舉墜場無遺美次歷南梁首謁三賢與



場之人士講求大義無不興起時有義竈顧天德練  
應科者欣然以鼎新爲已任合材集役輪奐改觀場  
之子衿王生潤赤走書於予求一言以貞石余何辭  
焉蓋人被圓蓋之覆不以爲功食土之毛僉謂固然  
神禹隨刊江海平流今之泛滄溟度長塹者以爲舟  
之力而不以爲禹之功也委功棄德遽焉不悟民之  
無良豈遂如是乘高者未有以呼之也譬則襁褓之  
鬼育於他氏見其母而詆之設有爲之誦其故則必  
且愕然駭泫然涕泗矣今民之不識三賢何以異是

苟一呼之豈惟三賢將生成之澤高厚之恩下及簪  
履衽席之遺莫不同念而醒之矣是舉也呼之者徐  
公和之者王魏兩生而應之者又豈止練顧兩義士  
也哉抑三賢修隄而民有土徐公修志而民有心安  
在三賢之不足四與徐公諱光國字瑞徵浙之常山  
人魏生諱公輔字弼卿王生諱元鼎字去廣俱泰州  
人

修復土橋記

丁溪

本場楊

果

戶部  
侍郎

興化縣北十七里有土橋邑人鮑氏世居之橋橫亘

官防中蓋宋所謂紹興堰而今之劉隄者也其在土  
爲南北陸走之會下爲灌溝以束諸水之所趨旱則  
塞其下流以防走洩以資灌溉水則決而瀉之以殺  
奔潰之勢舟楫之東西行又多問津於是舉而三  
利具作者之功不可誣也顧惟圯廢旣久漫無踪跡  
幸其石之獨存予以先大夫墓在其左因而田廬其  
右歲時往來雅意修復而力未之逮嘉靖改元適春  
旱予時得告家居旣贊邑侯以修前堰因思復茲橋  
屬鮑氏左右之興百年之廢於旬日之間所謂三利

者得以次第而舉顧壩之去橋不數武泗流吞蓄上  
下環壩多無賴子肆爲需求三利復而二害萌竊又  
病之明年春迄夏復大旱乃聞之官而事改築焉於  
是名姚子望者爲西壩一羅家港涓子者爲北壩  
二壩之中堅如甃封之上平如砥杙之外比如櫛也  
又浚橋之上下流於椒垆達於西壩長千仞有奇水  
之淵者淤如坊之卑者屹如舟之膠者沛如也於是  
利無漏孔害無伏機雖不敢遠擬作者之功疇昔之  
願亦得以少副矣費之所出予十之四合鮑氏爲十

之三合田於是途於是者又十之三爲錢總若干緡  
有司不一與也田於是者爲鄉進士沈本爲待選官  
徐經爲魏騫趙霖王臣顧鵬爲子族弟棐凡七人途  
於是者爲成尚書孫就爲許儼徐紀羅章袁正凡五  
人不容少共資而沒其義也鮑氏爲鵬爲轅爲恕爲  
慈經畫程督則爲思爲相之勞也相鵬之子學於予  
廩於庠用世之才是蓋可覘也已旣卒事相請記以  
永久遠予惟水之利害博矣豈特一橋興廢爲然推  
之一邑得勝以下之諸湖可聞也賈莊以下之諸礎

可修也車路新溝山子之諸河可隄可堰可壩可閘  
也水利興則年穀登年穀登則民生足而國賦充此  
實仁政之先民生之急庸情顧忽焉而不加之意亦  
獨何哉顧予爲力其及幾何但觀橋之興廢不能不  
重有感也於良有司之方來又能不重有望乎

五賢祠記

拼茶

周

鑛

大使原任吏  
科給事謫降

祠爲何而設也欲其興文教準道化示民方也濱海  
之民以煮海爲役無所聞見而其子弟恆多朴野間  
有秀出而成名者無多焉吾慮其弗興於文也文興

矣吾慮其材之不達也材達矣吾慮其無向道之準也自尼聖而下民孰能底其盛且郡縣祀典移之鹽場其勢必難勢難必衰嗣是而下有周程張朱五大儒實能續道統之傳其備道成身輔翊經訓爲範百世自天子以至庶民由都國以達海隅人皆家誦而戶得之矣予待罪鹽職其於文教竊有志而未逮廼敢改社學之三楹爲五賢堂立南向之前門爲先正門四有繚垣西有別門皆舊制也凡朔望率士夫鄉耆塾師并子弟之在各塾者瞻拜禮畢誨子弟則少

明身心之學諭衆庶則宣木鐸詞解盡晨而退率爲常規夫何地非人則何地非教也使海竈之人文教果行焉所謂君子學道則愛人小人學道則易使也故有能服周程張朱之訓則亦足矣以浚明庶位贊翊皇猷况又能身周程張朱之行則豈有不拔乎流俗邈濂洛而接洙泗者耶而吾養天下以善之心斯不負矣其場西則改舊廟爲東海神祠以舊觀爲土谷神祠合先賢爲三祠春秋祭品皆鹽課司東南隙地二十丈召人列居取其租而供之皆請於上司俞

允經久其品式之常禮儀之節勒諸碑陰設有繼乎此者宜與場司相爲無窮者也嗚呼道不可變也是祀之義其又庸可變耶

繆氏二賢祠記

拼茶

楊果

繆氏世居拼茶場元至元癸巳間有曰思恭氏者字德謙辟充令史適僞吳張士誠陷泰州明年陷揚州丙申復陷蘇州公隨軍征進克復高郵所向有戰功超陞萬戶士誠以鄉人故欲召爲援公曰挽回元氣在此一舉乃身往勸之以請朝命奉正朔不失爲忠

臣之說士誠因自戢不亟爲亂者數年公之力也陞嘉興府同知興學校勸農桑累遷至淮揚路總管徵爲王府叅軍疾作不果行而卒弟思敬字德中以有才德聲望時亦爲士誠徵啖以樞要迫以威武公正色曰見得思義見危授命人之大節吾寧殺身以成仁不偷生以害仁也士誠不敢屈迨我皇明混一區宇登用豪傑有司以茂才舉公授麟游縣簿尋復以直諫謫戍於戲壯哉當元季之習瀕海之人非有涵濡造就之功培植薰淘之素而二公者明節於一時

濟美於一家後先相望殆所謂生理本直道著而氣不可撓者耶是可爲百世風矣乃嘉靖丁亥侍御雷君來督淮揚鹽法事按郡乘知其賢名場之父老與繆之子弟諭之曰先達者鄉人之表也祖宗者子孫之憲也若知汝場人物繆氏二兄弟之爲賢乎其盍撤場之淫祠非祭法所宜有者改祠而俎豆之將使場之人旦夕過其祠肅然斂衽相語曰是吾鄉之先達也彼人也我亦人也吾不能遠追古聖賢之事業其不能廉頑立懦以期無愧於吾鄉之先達矣乎又

將使繆之子孫春秋奉其祭祀愾然作氣相語曰是吾之先人也彼善是吾子孫與有光焉吾苟不肖則先人之辱矣是安可不夙興夜寐慮忝所生以期無辱顏於對越之位駿奔之時矣乎於是運長吳君允楨副使劉君太清卽以繆氏原建官侯廟改而爲祠中爲堂者三楹前爲大門繚以周垣長濶計二十畝仍令繆氏子孫世守而奉祀焉

范文正公祠記

草堰

楊果

有宋天聖改元汝南范文正公來爲泰州西溪監官

時風潮泛溢沒田廬壞亭竈民以大病公特爲請於朝得調丁夫四萬跡唐李承實捍海故堰而修築之用是海濱沮洳斥鹵之地悉成良田而民獲奠居其爲惠利甚大以溥也公沒而所在德之不忘往往廟貌而俎豆之水旱疾癘則禱焉草堰小海二場間舊有公祠旣久而圯地且湫隘雜以淫鬼妥靈竭虔兩爲匪稱歲正德丙子國子生宗部宗節鄉校生宗邾朱軌唐滿相與捐貲倡義圖善地而遷之力猶未逮則以告於巡鹽侍御盧君楫君慨然曰吾事也乃俾

運使胡君軒續其費運判聞人韶小海場大使王鐸督其成鳩工增材擇吉從事門坊堂廡次第完好無侈無陋中尙公像以快瞻拜訖工盧君記其事而馳書告果文其麗牲之石方首事時有語果以非政之急者果曉之曰夫是舉也所謂義也捍災禦患秩在祀典古之制也崇正去淫訓之善也俗之所趨也義以協制制以章訓訓以成俗侍御君之政可謂知所先而所以自期待之至亦可占其槩已惟公以一代傑出之才筮仕之初卽爲吾民禦災興利垂之遠久

中一陽志 卷之九  
章章如是而公之傳誌皆不序列獨間見於宋史河渠志得非掩於其大而略之耶於人爲大於公爲小則公平生之所謂樹立可知其感吾民如此則其感動當時之天下者可知也歐文忠公謂其爲政所至民多立祠畫像則不待公之沒與後世其生固已神明之矣於乎懿哉果生長是鄉衣被遺德敢爲之詩俾鑱其石詩曰天之降才有嗇有豐三代而下維宋斯隆誰其傑然曰我范公公之筮仕吾邦伊始海水時溢民病瀕死隄而岸之利興害止入廬出田永永

無患百世之下姓隄以范俎公豆公廟惜不萬公於天下如龜如著踪跡所到精神隨之我民祀會則如所私誰新公祠柱史之政有儼其像如視如聽孰其過之而敢不敬公福我民罔間明幽水旱疾癘有禱無憂我詩廟門尚昭公休

宗列女記

草堰

興化

李思誠

翰林編修

自古侈談節義者多出於士君子而誦於婦人女子至沉沉白日寂寞素心又多出於婦人而未聞出於女子乃吾里之稱宗貞女者何貞女之稱貞也志守



也雖僅一言之成不敢渝也然而猶稱宗也志所出也雖有百年之誓不及從也蓋貞女爲吾興之海上人父部執金吾母王氏生一子早死三女貞女最幼方五齡許聘陳氏子必堯至年十八而有烏口之變錄躡淮南趨秦郵必堯時讀書郵之天王寺倭縱火燔寺竟燼死夫必堯與女甫繫纓凡牢烝之誼漠然未就卽轉而他從未有非之者乃號慟崩摧誓以死殉時父部已歿獨母王在雪涕而語之曰吾與汝相依爲命汝死吾亦死耳始稍稍進七箸爲勉起久之

陳父母憐其意與王母復合議將改適之女曰吾徒以有老母在故緩須臾耳奈何一旦議及此豈吾難一死哉察其意皜皜焉亭亭焉懍於烈石有耳可截目可剔盟不可再要之志自是兩家父母無復敢言婚事矣未幾陳之父母相繼卒夫與必堯未成夫則於父母猶未成舅姑也乃爲衰麻奔奠一如舅姑禮越數年有羽士振衣曳屨獨來吾鄉云吾陳必堯也鄉之人舊與熟者趨而徵其容儀卽優孟之學叔敖周昉之貌趙郎未必刻畫乃爾果必堯也問以疇昔

之事縷縷陳說不爽必堯小指缺一尖驗之亦然則  
又必堯也獨女不爲動曰吾心如古井水波瀾不起  
矣卽陳郎何爲寧以陳郎死而知我之心無以陳郎  
生而易我之節彼何處男子而敢瀆冒我耶羽士聞  
之咨嗟而去畱念珠擊魚促其入道曰吾亦翩翩五  
湖矣夫以未施容臭未奉盤匱之舅姑而爲之成禮  
此禮古未有也古人慮有難爲者故不制也而女爲  
之其有舅姑所以有夫也而以同姓字同音容之丈  
夫則又不爲之屈節總之自口烟一熾此心已與必

堯俱灰念白印之真骨則舅姑不忘慮黃犢之廣名  
則丈夫可絕是雖不事陳郎而所以報陳郎者至矣  
嗣是含秋霜披皓月者百年如一日布衣淡食朝夕  
勤女紅修甘隲以奉母母亡而襄事成禮時年三十  
三矣女之同姊適予伯父早逝繼伯母仲氏收卹宗  
氏反厚其家因從海上迎女僦居城中乃其性茹蘖  
含冰藩籬愈峻卽邑中閨媛有慕之而願一識其面  
者曰吾女也不敢輕往來至姻戚憐而問遺亦不苟  
受曰百年粗糲半菽而足其芳潔類如此比年五十

四歲觀風者循令甲以聞於朝下禮部議復云白頭  
室女自古少聞青年不字於今罕見函下有司爲建  
楔復丁給粟帛如例而一時匆遽用庠西坊爲易一  
名當之會邑侯梁公來謂貞女不字在費序非便乃  
移植所居里逾歲而直指康公來廉得其事異之下  
檄發贖鍰爲治第云女老矣使及身而見之自念而  
慰藉云吾苦節而有今日邑之士若女見女之芳華  
而羞世之污辱相感而矜奮云彼苦節而有今日業  
以晚矣其亟議勅何恡小費爲於是買民間地一區

庀材鳩工不數日而落成有寢有堂有廡有門復遺  
坊表之曰宗貞女第悉如康公檄而徵言於予嗟嗟  
婦人之稱節難也而女子尤難之難也如陳孝婦之  
致早宋伯姬之赴火楚夫人之沉水其節烈高奇燁  
煜往冊者皆以婦人而女子中無聞焉蓋婦人舉案  
齊眉歡然歲月其守固天性也而猶介於情女子淡  
閨祕閣邈矣河山其守也情於何有而一裁於義及  
此其粹白堅忍之操雖無低昂而不敢謂其非尤難  
矣當移居之日梁邑侯製冠服扁與鼓樂前導迎闔

邑之士若女奔赴而往觀者市爲之罷室爲之空皆  
心艷之而歎其晚則斯事也在曠世爲奇節在今日  
爲盛舉其關係豈渺小哉是可以風也已

重濬玉帶河記

草堰

興化

李思敬

戶部  
主政

東河之濱有一彈丸黑子之地兩場勝槩民居雜處  
其南則爲小海而北爲草堰者也中有古蹟支河舊  
名玉帶夫河而以玉帶名者取其紆迴曲折環抱滌  
旋周流宛轉故曰黃河如帶此其類耶然而此河之  
通塞尤係人事之榮枯遙稽先世之風地靈人傑民

多雅馴科第雲仍爲諸場冠嗟乎數十年來斯文如  
喪每訪之堪輿家莫不云人文阻阨是由此河之淤  
塞也兩場人士抱憾已久咸欲濬其塞以復其故焉  
雖然民間之利上實宰之乙丑夏繡衣使者陸公按  
部場之人士具詞以請公俞焉以屬分運徐公徐公  
聞之駸駸色喜不辭溽暑親爲下車以閱速令宰場  
者丈量督工又復捐金分俸坐觀此河之有成也兩  
公之澤其並與此清流同不朽也哉語云千里黃河  
豈無一曲而玉帶之水乃真脉耶四瀆朝宗滙精沃

若而玉帶之流其靈運耶地仍靈也人仍傑也而夏  
思誰之力也河成多士以記請因述河之始末與二  
公流澤之著云草堰場大使喻章魁小海場大使何  
一球皆督工勤勞者例得並書

范文王公祠堂記

小海

盧

楫

密雲人  
御史

予奉勅提督兩淮鹽課寓揚州明年二月九日出按  
小海草堰二場皆泰州分司所隸者有監生宗部  
節生員盧木宗邾朱軌唐滿謁予曰兩淮運司三分  
司三十鹽場皆臨海民竄雜居東有范公隄宋文正

范公於天聖間宰興化因民苦海潮泛漲爲之築隄  
以捍而民害去凡屋廬以居畊稼以食桑蔬以衣至  
今賴之然今之遺德在民感而建祠所以致崇報意  
也年久兵火十存其一舊址在草堰者陝隘小海場  
東坦口高曠足以繼妥侑之枕顧材用之備僅三分  
之一餘則力不能爲矣若成而廣之竊有所望焉予  
嘉其義舉且關風化付運使胡軒區畫仍委判官聞  
人韶督同小海大使王鐸相地集材經始於六月甲  
寅落成於七月甲午諸生復進曰是役也人心樂從

材用易舉蓋有不期然而然者請刻石以紀始末夫  
文正公築隄捍海爲當世之民也安居奠業於數百  
載之下感之者尚如此則在當時者又何如耶是知  
士之遭際於時心之存者不正學之得者不純間有  
純且正者行之於身而措之於事不力且堅則一事  
之偶合於理而他事多乖貧窮或能講論而富貴則  
移處常或易爲而遇變則改其節見利趨見害避若  
此可望其樹功當時遺澤後世來人心之感乎我范  
文正公窮居益自刻苦有先憂後樂之志大通六經

本聖賢仁義之說未遇時心正學純所以在興化而  
決意築隄居臺諫而爭執充待制而抗相經略邊方  
而西羗畏條對大廷而忠亮存常變窮達間不顧利  
害皆由於心心學純故見之設施而力且堅此其所  
以久大之功業著於後世致人心之感自有不容已  
也今日感捍海之恩者特一隅之祀耳噫祠宇旣成  
丹堊旣飾公之像儼然如在諸生崇報之忱遂而貪  
夫懦子過此以晉謁覩公之遺像追公之往事未必  
不生景慕淬厲之心以自興起也夫豈斯日斯人之

私耶是爲記公以日典賦也夫豈泚日泚人之  
夫重修范公祠記小海李思敬未  
小范老子文正公爲秀才時以天下爲已任天聖改  
元來監西溪鹽倉於是海波橫溢不由地中行風潮  
屢作漂沒田廬民爲魚鼈東南半壁盡泛陽侯國家  
煮海之利日淪於虛而國計民生將奈之何公乃先  
天下之憂而憂築隄捍海工未竣而轉運張公綸請  
遷興化縣令以專其任旣以丁夫旋溘死而朝議欲  
罷之副使胡公令儀力爭以底於成於是淮南二十

五場之民盡登華胥春臺之上文正公之功德洵不  
在禹下矣諸場建祠崇祀以報之堰海兩場皆有專  
祠兵火之餘兩祠俱圯正德丙子侍御盧公楫乃卽  
小海善地鼎新之歷嘉隆間修葺不一至萬曆間歲  
久民玩無知雜沓其中文正公示譴中庭遂災天啓  
乙丑分運徐公光國纂創場志禮聘文士魏生公輔  
王生元鼎諮訪文獻拜瞻祠宇目擊傾頽乃召二三  
義士相與講求文正公之德業場之人士勃然興起  
咸謀所以葺之會逢侍御陸公按部茲土多士具詞

以請公嘉其好義捐贖金以屬徐公徐公亦捐俸以襄其事場之人士爭先樂助焉乃爲之鳩工集材擇吉以舉門房堂廡次第聿新奉文正公神主而祀之以張胡與有勲勞爲之夾配乃走丐余記以永貞珉夫文正公築隄捍海以爲民也曠世以來戴其德者尸祝不忘實當日先憂後樂一念有以致之也陸公徐公亦憂其憂於數百年之下海濱咸荷其庇以故兪民之請聿新厥祠亦無非憂國憂民至計也其功德不上追先賢下流百世乎陸公字貞吾諱世科浙

江鄞縣人徐公字瑞徵諱光國浙江常山人

新開運鹽河記

小海

泰州林

春

吏部員外郎

自古煮海之利重於東南而兩淮爲最我朝通商惠民酌古而式於今者又非前代所及故兩淮轉運統鹽場三十而場之廣隘圍之多寡皆有運河輸賦於倉載薪於團乃竈民所利以急公上者也惟草堰小海二場壤地相接合而居之故小海之運寄於草堰之河民苦於今者以役不容已安重於遷每一輪賦載薪往返倍行三十里積以期年妨功倍運其勞可



知况小海草堰隔越水道而採薪以供用者以遠且  
勞率多棄之至秋竟成野燒而已課恆稱歎民日就  
困乃嘉靖丙申冬十月覺山洪公來按兩淮聿新憲  
度加意窮民凡風教所關人情所愿者修舉無廢蓋  
奉天子之命推一體之仁惟恐其或後耳監生宗部  
庠生唐滿輩狀事白公應曰可遂命運使鄭君漳運  
同胡君淪孫廷相運判王君冊相董厥事出贖金若  
于兩應賑者半焉從民請也名工開鑿不勞於民不  
取於衆計工食力計日程功而運河以成長三十九

里廣二丈二尺深四尺因舊河之湮而開濬者二十  
里可以見今古所因人心所同也豈非久湮於昔而  
大通於今哉經始於戊戌二月四日訖工於四月晦  
日督工夫大使王瑞竈民宗郁輩皆與有勞可書碑  
陰卽今勞者息鄰者利採入者便而地產弗遺課用  
是裕公之惠當與河流永長矣昔者文正公築隄捍  
海民到於今思之此河之鑿實嗣其後後之視今可  
與並觀矣况公嘗立諭長建義倉禮賢士禁遊民皆  
正俗康民因人心而利導之者也使後之來者無忘

前功無後已能利民宐時者相與修舉焉將視此而  
動深長思也豈惟小海之利而已哉公名垣字浚之  
婺源人登壬辰進士

疏揭 雜著

明

薦處士王艮疏

婺源 吳 悌 巡鹽御史

爲舉逸民以昭聖治事臣始嘗聞人言東海之濱秦  
州安豐場有士王艮可當其選者然嘗竊慮盛名之  
下其實難副處士驚虛聲以欺世亦時有之臣藏之

中久矣近因奉命來巡兩淮乃得僞詢衆庶聞其早  
歲僅受讀孝經論語亦不甚解蓋非素業儒者比及  
三十時所讀書若或啓之從此一意向學銳然以聖  
賢爲必可至乃始論交於天下之士證疑於孔氏之  
書久之而所得日以邃焉其孝友忠信孚於鄉黨宗  
族而開導作人務盡其材四方之欲問業辨惑者羣  
至其門好學之志老而愈篤臣試覈其名實果亦符  
應然後就而訪之見其人襟懷灑落儀度雍容真機  
流行不事矯飾雖因執喪哀毀氣體稍弱而議論亶

中一 場言 卷之九  
三  
壘曲中人心精誠潛通使人有所感發蓋其學主於  
自得不落於言語文字之詮且少無觚翰之習長不  
踐聲利之場平生不見異物而遷焉故其工夫最直  
截簡易而行年六十造詣日深就其所至殆庶幾乎  
若玉之琢不復爲璞若金之鍊不復爲鑛視世之拘  
儒曲士顧非所可揆者斯亦洛中之儔而與弼獻章  
之流也斯可謂聖世逸民矣

請易名崇祀疏

典化 吳 牲 學士

爲表章真儒乞議易名崇祀以明正學以光文治事

嘗考周禮士之有道德者沒爲樂祖祭於瞽宗又古  
者士大夫死而易名以彰嫫行爰有謚典雖褒崇各  
異其於表章先哲翊揚風教均也而况闡明道術德  
在人心功垂萬世者謚與祀固可緩乎哉邈自孔孟  
下迨宋儒或稱千聖之真傳或名六經之羽翼有功  
斯道俱隆是典至於我朝太祖開帝統於中原列聖  
顯文謨於奕世淑氣所鍾名賢輩出如薛瑄胡居仁  
陳憲章王守仁等業採羣議各予美謚侑食孔廟崇  
儒重道於斯爲盛矣而臣竊以爲未盡也其間名世

間出真儒蔚起或以歷世尚淺偶因公論之未定亦有潛見殊遭苦於表章之無人雖洙泗一脉不乏繼統之賢而俎豆千秋容多未舉之典然不墜者道不晦者心今聖明御宇正大道中天之會而禮官議謚乃微顯闡幽之時所爲紹明聖統表章實學經正民興千載一日天蓋以開陛下也以臣聞見最真私淑有年世未遠而居甚近風猶在而澤未斬如故儒王良者臣謹據實爲陛下陳之良泰州安豐場人場俗放業鹽無宿學者而良孝出天性寒日見親以急務

盥泔水乃痛哭曰某爲子而令親天寒盥泔水乎何用人子爲於是出代親役入灑埽定省如古禮惟謹時武宗朝嬖倖佛神等索鷹犬於鹽場有司派諸竈丁有良父名良毅然代父往極言利害事遂寢久之謝役秉禮爲儒者行益純忽心量洞明悟性無礙而天地萬物爲一體行住語默皆在覺體中王守仁巡撫江西講良知之學良聞而造之往返問難悉其精微已而太息曰是良之罪也夫何風之未遠也駕蒲車北謁孔廟所至以道誨人畱京師一月竟諧衆心

而返良骨剛氣和性靈朗澈見人矚曉卽知其所存  
接引人無間僕隸雖貴顯悍戾聞言愧悟有蓄疑不  
解者苟及他事使本疑頓釋機應響疾是時同講習  
者如山陰王畿安福鄒守益吉水羅洪先皆海內名  
儒從良學者甚衆而林春爲第一春亦泰州人以會  
試舉首官吏曹至文選郎中尊信師說終身不懈蓋  
良之學以悟性爲宗以反已爲要以孝弟爲實以樂  
學爲門以太虛爲宅以古今爲旦暮以明學啓後爲  
重任以九二見龍爲正位以孔氏爲家法所著語錄

及樂學歌孝弟箴求仁方格物要旨鯁鱗賦明哲保  
身論皆洞察性理鼓吹聖統脫訓詁之筌蹄探孔孟  
之精奧總之良得力處透悟似九淵而不鄰於禪理  
學似朱熹而不滯於迹先臣大學士趙貞吉稱其契  
聖歸真生知之亞蓋實錄也洪御史垣構室居其徒  
吳御史悌抗疏表其學海濱學者尊之爲夫子迄今  
宇內士大夫皆稱之爲心齋先生良沒而其子王襃  
最知名獨得其傳世儒亦稱爲東厓先生襃博問精  
討遡流窮源生平嚴取予敦孝弟標樹山嶽之上越

軼風霆之表嘗與門人扁舟往來歌聲與林樾相激  
發聞者以爲有舞雩詠歸之風海內名卿鉅公如李  
文定春芳凌中丞儒羅叅政汝芳聘迎無虛日又如  
臣邑韓貞以村里陶人一遊其門卽成彬彬儒者今  
祀鄉賢有光邑乘益見良之風教遠也皇祖朝議良  
從祀未果今公論久而益定大道闇而日章臣愚竊  
謂布衣易名從祀自胡居仁而下無有右於王良者  
臣因是而知聖賢淑世之功大也在昔韋布主盟斯  
道明述之業與平成之勲共懋空言之垂與典謨之

訓並傳何哉蓋道之不行其患大而道之不明其患  
尤大不行之患升沈猶在世運不明之患晦蝕遂在  
人心世衰道微異學蠡起邪說橫議簧鼓世教其弊  
流爲竺乾老莊而其禍慘於洪水猛獸所賴天生聖  
賢提醒聾聵振覺世之金聲掃迷途之榛棘倡明絕  
學昭於大道如夢者困而得覺如醉者迷而得醒良  
知格物之學真千聖之滴派而儒者之正宗也議者  
謂王守仁之功不在孟軻下臣亦謂良之功不在守  
仁下蓋守仁之學得良而彰明於世守仁名位顯赫

事業彪炳世皆知之而良之功在萬世之人心祇以  
隱處草澤表章無人未崇大典臣生同里聞素得於  
聞見之真故敢據實敷陳庶幾揚潛德之光翼文明  
之化云爾伏乞勅下禮部會集羣議如臣言不謬將  
先儒王良議謚從祀孔廟并將良所著語錄諸書編  
於性理大全之末列在黌宮詔示後世他如議祀儒  
臣尚有臣真晟羅倫章懋黃仲昭吳與弼鄒守益皆  
緒接真傳有功道統曩者廷議以祀典隆重姑俟論  
定若併議褒崇尤昭公論於以明正學而光文治臣

所爲天以開陛下者豈非聖世第一美政哉

請謚名賢初揭略

泰州劉萬春武選司郎中

爲合闡應謚名賢乞賜採擇以光大典以昭公道事  
一爲泰州王心齋先生名良先生少未學問讀論語  
孝經忽悟聖賢可學以經徵悟以悟釋經行卽悟處  
悟卽行處如此有年人未之識也江西人有客安豐  
者聞先生說論語詫曰此絕類王巡撫公之談學卽  
日造江西服古冠服賦二詩爲贄上坐論學辯難累  
日始師事焉先生接引人無間僕隸雖顯貴悍戾不

說學者聞言皆悔謝不及有蓄疑不解者及他事使本疑頓釋雖村里陶人一遊其門卽成儒者彬彬如也所著有格物要旨勉仁方樂學歌并語錄等書傳於世蓋前哲稱先生之學以太虛爲宅以古今爲且暮以明學啓後爲重任以九二見龍爲正位以孔氏爲家法與越中並稱王先生辛丑館課表揚略盡竊謂議易名於今日未有逾於先生者也

樂學歌

王艮 安豐人  
大儒

人心本自樂自將私欲縛私欲一萌時良知還自覺

一覺便消除人心依舊樂樂是樂此學學是學此樂不樂不是學不學不是樂樂便然後學學便然後樂樂是學學是樂於乎天下之樂何如此學天下之學何如此樂

青天歌

王夔 艮子  
大儒

青天莫起浮雲障雲起青天遮萬象萬象森羅鎮百邪光明不顯邪魔旺我初開廓天地清萬戶千門歌太平有時一片黑雲起九竅百骸俱不寧是以常教慧風烈三界十方飄蕩徹雲散虛空體自真自然現



出家家月月下方堪把笛吹一聲響亮振華口驚起  
東方玉童子倒騎白鹿如星馳逡巡別轉一般樂也  
非笙兮也非角三尺雲鏃十二徽歷劫年中混元斲  
玉瓊琅琅絕鄭音輕清編貫達人心我從一得鬼神  
輔入地上天超古今縱橫自在無拘束心不貪榮身  
不辱閒唱壺中白雪歌靜調世外陽春曲我家此曲  
皆自然管無空兮琴無絃得來驚覺浮生夢晝夜清  
音滿洞天

孝弟箴

王艮

事親從兄本有其則孝弟爲心其理自識愛之敬之  
務至其極愛之淡者和顏悅色敬之篤者怡怡侍側  
父兄所爲不可不識父兄所命不可不擇所爲若是  
終身踐迹所爲未是不可姑息所命若善盡心竭力  
所命未善反復思繹敷陳義理譬喻端的陷之不義  
於心何憚父兄之愆子弟之責堯舜所爲無過此職

王心齋先生墓誌銘

內江趙貞吉大學士

明興八葉之世越中王守仁論學名世從遊若泰州  
王子稱最著王子名艮少先生十一歲先生歿王子

論學如先生故學者亦稱王先生先生泰州安豐場  
人安豐俗業鹽無宿學者先生逮粗識論語孝經章  
句卽邈焉如古聖賢人信口談解如或啓之塾師無  
敢難者一日天甚寒至親所親方急鶩盥冷水乃痛  
哭曰某爲人子令親天寒盥冷水而不知也尚得爲  
人乎自此遂出代親役入埽舍捧席哺二老晨省夜  
問如古禮惟謹時年二十矣先生孝出天成久益行  
純心明悟性無礙謝役秉禮爲儒者以經徵悟以悟  
釋經行卽悟處悟卽行處如此有年人未之識也嘗

一夕夢天墜壓身萬人奔號求救先生身托天起見  
日月列宿失序又手自整布如故萬人歡舞拜謝醒  
則汗溢如雨頓覺心量洞明天地萬物一體自此行  
住語默皆在覺中題其座曰正德六年間居仁三月  
半卽先生悟入之始已能如此是時越中王先生自  
龍場謫歸與學者盛論孔門求仁知行合一泥者方  
仇爭之至十四年王先生撫臨江西又極論良知自  
性本體內足大江之南學者翕然從信而先生顧奉  
親鶉居皆未及聞也有黃塾師者江西人也聞先生

論詫曰此絕類王巡撫之談學也先生喜曰有是哉  
雖然王公論良知某談格物如其同也是天以王公  
與天下後世如其異也是天以某與王公也其自信  
如此卽日往造江西蓋越兩月而先生再詣豫章城  
卒稱王公先覺者退就弟子間出格物論王先生曰  
待君他日自明之久之從王先生居越歎曰風之未  
遠也是某之罪也辭還駕一蒲車二僕自隨北行所  
至化導人聳人觀聽無慮千百皆飽飫感動未至都  
下先一夕有老叟夢黃龍無首行雨至崇文門變爲

人立晨起往候而先生適應之先生丰格旣高古所  
爲又卓犖如此同志相顧驚愕共匿車勸止之先生  
畱一月竟諧衆心而返然先生意終遠矣越五年戊  
子王先生卒於師先生迎哭於桐廬經紀其家而還  
開門授徒遠方皆至先生骨剛氣和性靈澄澈音咳  
盼顧使人意消卽學者意識稍疎陋不敢正以視先  
生引接人無間僕隸皆令有省雖顯貴至悍戾不悅  
者聞先生言皆對衆悔謝不及往往見人睂睫卽知  
其心別及他事以破本疑機應響疾精蘊畢露廓披

聖途使人速進蓋先生之學以悟性爲宗以格物爲  
要以孝弟爲實以太虛爲宅以古今爲旦暮以明學  
啓後爲重任以九二見龍爲正位以孔氏爲家法可  
謂契聖歸真生知之亞者也獨不喜著述或酬應之  
作皆令門人兒子把筆口授之能道其意所欲言而  
止晚作格物要旨勉仁方諸篇百世不可易也卒配  
越中爲二王或問先生何不仕曰吾無往而不與二  
三子者是某之仕也或謂先生爲隱曰吾無往而不  
與二三子者某何敢隱也兩救海濱之荒活千萬人

洪御史垣構舍居其徒吳御史悌抗疏薦之不報嘉  
靖庚子十二月八日卒銘曰越中良知淮南格物如  
車兩輪實貫一轂後有作者來登此車無以未覺而  
空著書

淮南中十場誌卷之十

詩

場必有景景必有詩詩必以八不知始自何  
人存而不刪妍蚩一仍其舊示不敢專庶可  
幸無罪於  
前人云爾

明

富安八景

祠山夕照

東臺 錢象乾

古寺荒涼晚照開  
征鴻遶帶落霞來  
楓林淺映松楸  
色疑是天孫錦  
妙裁

東臺黃衣  
缺口晨炊

晨烟散漫日初暎  
缺口猶聞雞犬喧  
水澤豈無豪傑  
士誰炊香稻飯  
王孫

青亭新月

江西魏學唐

海青亭畔暮雲收  
淡月娟娟影暗流  
閒聽秋聲天外  
至驚飛鳥鵲遶枝頭

范堤烟柳

魏學唐

參差萬柳障遙天  
翠拂芳堤捍海邊  
應是使君流澤  
遠和烟和雨自年年

新彝酒旆

黃衣

魚鹽境裏暫遊遨  
共載琴書上小舸  
不用臨風弔今  
古彝橋淡處酒旆高

玉池精舍

錢象乾

三刹相連阿玉邊  
數聲清磬韻悠然  
迢迢良夜諸緣  
寂月印澄潭樹鎖烟

月塘曲徑

典化張孺教

紆迴小徑傍芳塘  
歲歲春來耒耜忙  
婦子饁農披曉  
霧牧童橫笛送斜陽

西湖雲影

張孺教

蒼茫無際水天秋雲影湖光一望收欸乃數聲隨棹  
發時驚鷗鷺度千流

輓節婦王氏

崔殷

孀節勁于鐵清風凜若秋無兒孤一世有淚溼雙眸  
老竟依猶子貧甘到白頭瘞玉良人側平生志已酬

謁王心齋先生祠

崔第

豪傑生濱海高風播四方道能追孔聖興豈待文主  
化遠看來學生榮觀薦章海陵勤廟祀野老望宮牆

送分運周公北上

崔第

大堤迴接帝城遙遺愛祠前別意饒邗水清風隨畫  
舸蜀岡春色映丹青心存淮海三千里人遠鶯花廿  
四橋惟有泰東堂上月一輪猶伴紫宸朝

皇清

頌分運芾翁汪公祖德政

徐紹孫 孝廉

分符海甸得司鹽何幸遐陬庇二天祇見勞心飛雨  
露却畱清節上雲烟東亭澤霈新棠麗北闕儲豐峻  
業全似此雄才當理劇九重何事慮籌邊

又

葉蔭生 孝廉

利器優盤錯煩公理賦財兩淮資保障十屬待招捺  
澤共棠陰久春同黍谷回他年襄庶事更羨詠康哉

又

徐咸受 貢士

聞道江城勝事繁雙岐新詠此中存春風花發誰年  
樹夜月桴懸何處村信是高名推卓茂果然異績得  
劉琨南來屬邑原相近膏露重滋到席門

明

東臺八景

新廳明月

興化王之案

夜迴琴堂幾樹鴉中庭月色靜無譁遙知一片冰壺  
意分得清輝十萬家

古堰清風

閒磨苔篆認碑題捍海功成誦范隄立馬風高清徹  
骨至今夜靜哭鯨鯢

萬竈青烟

井牧斜連萬樹晴花邊犬臥月無聲年來煮海常多  
暇贏得炊烟到處生



千峰白雪  
海上銀嵯走萬舸  
玉林笑指勢嵯峨  
謾言瑞雪關豐稔  
不道通商瑞更多

南畝春耕

風入晴川綠滿陂  
田家生計半春犁  
農官指點垂楊裏  
正是清明布穀時

西湖夜釣

湖水平澗淨不流  
白雲紅樹坐磯頭  
老龍夜半時吞餌  
淇竹爲竿月作鈎

葦灣夕照

波光曲曲盡瀟湘  
落木汀洲掛夕陽  
問渡高僧今在否  
蒹葭秋水自蒼蒼

聖果晨鐘

曉來山寺忽聞鐘  
響落閒雲過遠峰  
化作虛無天籟去  
烟消日出數株松

楊公堰

四川楊澄  
巡鹽御史

千里禾麻伴草萊  
范公厥後又成災  
疏陳丹陛民愁活  
令下寒崖春意回  
萬丈巨鰲從地起  
一條周道自

天開方來同志宜同守絕勝庭栽王氏槐

千里社學落成四川徐鵬舉進士分運

肇修鄉學育賢流利必無謀學可謀子孝臣忠先致力聖經賢傳苦心求三場須要隨時習六藝還從暇日游鄒魯海濱才輩出斯時方可慰吾憂

頌楊公堤成秦州凌儒進士侍御

岸土初乾岸草齊使君功德在黔黎郵亭遠合高低樹野水平分上下溪雨後桔槔閒白晝秋淡禾黍啄黃雞他年此地民應說烟柳青青似范堤

慶社學新成東臺梅金周府審理

教育從今樂有基應知後學得宗師湮淪聖道斯時振廢墜綱常此日維枯槁生生活化雨萌芽漸漸長春曦文翁德教如星日海角嗇民恨見遲

贈運副使齋表回任梅金

一章曾捧拜金鑿贏得龍顏此日歡只說政聲垂海嶠誰知風采動朝端酒從湛露歌中醉花向玄都觀裏看第恐吾皇畱補袞嗇民引領望歸鞍

贈分運九霄徐公梅金

會看長安一日花東風馬上岸烏紗朝廷取士重金  
榜天下居官憚海涯本爲盤根求利器却令豪傑挽  
天槎今霄明月雲端出照徹淮南幾萬家

遊晏溪山寺

陝西閻期壽分司

一笑相逢信有期偶同蕭寺話移時談禪暫脫塵中  
網遣興閒尋壁上詩旅思淒淒非中酒人情落落似  
殘碁雲濤眼底三生夢鷗影秋汀又遠離

上分運海門周公

主盟東臺講壇葛雷

功公聲價重南金喜見星輅海上臨濁俗得沾新化

雨比鄰咸鼓舊瑤琴魚龍出沒春如許桃李吹噓花  
滿林荒僻久無風雅調洗心今欲聽韶音

上繡衣

時場有水災詩上得請

興化胡孝成

渤海連年風雨頻可憐赤子怨滄溟千村楊柳空成  
暖幾樹桃花自笑春綠野已無棲燕室蒼波惟有取  
魚人采風如問民間瘼早晚洪恩下紫宸

題節婦黃門王孺人詩

莆田陳伯陽

萬古頽風孰與維百年苦節正倫彝栢舟蚤勵冰霜  
操荆布長存金玉姿堅白不渝真女子綱常能立勝

男兒芳名此日登青史天道從來尚有知常流立烈  
皇清

頌分運芾翁汪公祖德政 蔣山彪 孝廉

東亭地僻草萋萋百島狼烟雜鼓鼙一自春風來萬  
里遂令晴日照羣黎公庭化洽來清譽金闕名高下  
紫泥窮海人人爭祝頌功勳重勒范公隄

又

楊繩祖 貢十金 華縣丞

由來歌孔邇歡愛若家人痛癢恆關念飢寒每切身  
祇求紓力役不憚久風塵尚慮脂膏竭蠲逋意更肫

又

劉先修 庠生

今日東亭路名同邗水清春風吹萬戶霜月照三更  
刑中臬陶化棠甘名伯榮仁慈經四稔荷戴並生成  
又 周泰謙 庠生

十屬爭傳父母來謳歌羣起沸如雷民沾雨露參差  
見庭有鶯花次第開勁節嶙峋披短褐清才俊逸賦  
官梅三年撫字勞動邨贏得甘棠滿地栽

明

安豐八景

月塘澄碧

喬楚 庠生

劈雲滄海墮蟾蜍一片空明沁太虛輕縠素圓犀暈  
滿清漪鮮躍蚌胎舒春生句草憐芳夜鑑剖天光夕  
照餘誰道濯纓無可問臨溪應是洗心居

又

傅應鸞 歲貢

帶水分來半璧宮汪洋不濁度應同萬川一勺何圓  
缺標指相看寸步中

豐井鳴瑯

喬楚

島嶼飛烟集彩濛銀河初下廣陵濤氣蒸海甸來秋

雨波落青冥起夜飈湘瑟欲寒雲水暗楚璫遙步月  
明高靈均遺響千秋壯川岳人文並足豪

又

傅應鸞

日日山門坐石圯琅璫聲裏賦長思尚方一撮和羹  
味忙殺千村鰲面兒

鹽山燦玉

喬楚

蜃市霏微烟島迷月明霜霰萬峰低驚沙龍子翻銀  
窟煉液真人棄絳泥魚海常懸軍國計波瀆應笑箒  
車稊東南珠玉原增重蛟火從看百疊齊

又

傅應鸞

銀屏紈嶂白瑤磬千百嶙峋簇粉圓疑是山陰逃積  
雪一回風雨一回殘

隄柳垂金

喬楚

砥柱何年錦障偏萬株雨霽亂含烟歌分汴水嫌隋  
曲春別長門倩客憐嫋嫋不禁寒欲墮纖纖初着露  
應眠行人漫自傳歌縷不道甘棠有大賢

又

傅應鸞

狂瀾一障卽康莊千縷扶蘇卜蔭長不識當年歌瓠

于至今誰復咏甘棠

崇寧曉鐘

喬楚

僊月樓臺玉一叢暗聲低度百花宮霜晨彷彿聞長  
樂雪夜還同憶遠公巢鶴露驚空翠裏驪珠潭冷積  
虛中久揀殘漏共行客淡省何人思不窮

又

傅應鸞

碧窗研露濺霓裳大叩聲傳續漏長于闐山鳴空裏  
應任教里耳賦唐皇

義阡曉磬

喬楚

諸天月色厥祇林哀玉初傳靜夜分  
戛戛欲鳴疑漢水琅琅時泛聽南音  
清鷗邁集芳洲思落葉圓同行  
路心擊碎白雲應縹緲却餘天籟定中尋

又

傅應鸞

棒喝知音說了禪法幢懸裏度  
愁眠悟來水擊羅浮石斷續清風  
徹暮天

北橋新月

喬楚

金風瀟瑟墮玄霜一曲纖纖照石梁  
翠木玲瓏金掌潤紫簫澄澈玉虹長  
座通御氣分靈界路逼銀河卽

上方水臥不妨疑醉眼白雲千頃跨瀟湘

又

傅應鸞

初閤天門晚照餘長虹如練鎖辰居  
此中應是銀河路搔首清光問帝墟

南浦潛龍

喬楚

興慶池頭氣色闌霏微湖鼎好重看  
千秋霖雨飛騰急萬窟雲烟出沒寒  
化劍已知千夜象抱珠應自徹  
泥蟠誰言淵躍非頭角奉若從教足  
大觀

百首又

傅應鸞

百道波光擁地來空中樓閣自天開  
畫圖蜃氣真堪似見說滄溟捲雨回

王汝止過訪弇園 六首 太倉 王世貞 禮部尚書

塵尾豎新義字字天機流其奈溪邊石頑愚不點頭

頌副運褚公濬河通運 本場 傅本川

疏鑿從來尚禹功於今奕世獨君同  
橈行不避程途遠籌算惟期轉運通  
自許一身匡社稷會看千里泛  
艤臙口碑未足傳仁澤刻碣流芳瀚海東

鹽丁苦 本場 季 寅

鹽丁苦鹽丁苦終日熬波煎淋鹵  
胼手胝足度朝昏食不充飢衣不補  
不知文不知武不知講論今和古  
每日侵晨只曬灰赤脚蓬頭翻弄土  
實勤勞實愚魯催征不讓陰天阻  
總催未去竈頭來公差迫捉如狼  
虎若見官活地府血比連連打不  
數年年三月出通關竈丁個個遭  
筆楚鹽完後始放還仔細思量難  
又難當初地廣人稀少今日人多  
地少閒無計策缺三殄衆開河道  
上沙灘地土不毛容易淺程途百  
里擔難擔蚊狼毒沒遮闌手脚通  
宵豈得閒饒君遍體泥



塗密到曉渾身是血斑喜夏去怕秋交愁遇風潮曉  
夜焦晝向海邊爲活計勤防月沒避潮高天色靜日  
光敲頃刻雲生霧搭橋播土揚塵風太急翻江攪海  
浪頭高魂嚇散魄驚消弛擔回頭且退跑快走之人  
猶得脫遲行些子命難逃潮退望白遙遙積屍纍纍  
任風飄呼兄喚弟漫天哭覓子尋爺遍地嚎冬月到  
少衣穿東海西風分外寒日食不周無倚賴公私逋  
負又勾牽風凜凜霧團團瓊瑤片片下雲端灰坑池  
井如銀砌南北東西去路難情切切意懸懸願望官

司發賑錢賑不猶緩須臾死萬里君門誰見憐磨折  
事萬千千曾似莊農學種田五穀收成真快樂半年  
辛苦半年閒

皇清

頌分運汪公祖

本場盛治  
進士河  
南道

幾年福曜照東亭盡說公廉似水清座上恆將犀角  
然階前頓息鼠牙爭陋規聿洗商胥悅美利頻興竈  
以寧遍聽閭閻歌頌起三賢今有四賢名

又

本場徐我達  
進士  
縣令

海陬荒僻滿蒿萊何幸神君縮綬來心事丹霞冰作  
操文章白雪錦爲才憂民四稔形俱瘁籌國多方  
慮不灰當代名臣推第一懸知異績到衡台

海潮行

本場沈研開 字亦季

乙巳之秋曰七月三日食時颶風發須臾天色黑如  
夜雨縱風威行殺伐初猶拔木摧民廬繼則崩山震  
大虛十家九家牆盡倒十里九里炊烟少屋瓦蝶散  
聲琅琅屋茅席卷餘空梁八盡水立夜不臥杳無一  
室畱燈光此爲城市尚如此瀕海之地復何似夜夜

防潮潮不來此夜雖防人亦死風聲能使潮不聲  
龍怪鱷驅潮行潮行迅駛有如箭翻使風聲居其殿  
雨工翼二怒不戢努力助潮如不及海上有墩設烽  
火尺計何止四五十潮來一瞬無羣墩側聞其上波  
狂奔老者斯時甘殉屋壯者恃強還出門出門低徊  
念父母入門復念糟糠婦或負或挈相呼號不知何  
處無波濤遠近呼號方午夜有船之家方欲駕其中  
忽滿無船人船主欲入翻無罅可憐浪勇船難支人  
人皆作水中屍老者幼者及婦女入水不得相持攜

獨有壯者猶倔強騰出洪波十餘丈口噴亂沫如濺  
珠至死猶然與波抗有船無船等傾覆間有逃者身  
附木鼃蛇蝨蟞紛求生人附什四彼什六自南徂北  
西迄東茫茫一白何終窮畜產民舍五百里盡化爲  
潮掀冷空君不見范公隄畔屍相籍昔嘗煮海皆供  
公家役又不見東海漂來木如山昔爲鹵棚鐵廠千  
萬間海水海水奈爾何又復傷我之口禾海禽飛飛  
無止所啼上城頭枯樹柯

洪水行

沈珩開

秦郵邵伯湖隄水聞與黃河淮泗相表裏湖隄之上  
曰上河湖隄之下何異在井底嗚呼人生此下河愧  
不爲魚爲鱉爲鼃鼃湖隄一朝突然倒翻以樂土稱  
洪波洪波十丈天上落上官一倍惜民瘼柳枝力役  
徵如雷萬夫築障不云弱小民恃此爲長城寧知此  
足傷其生破產買牛事田畝有牛無種徒然耕骨肉  
遞視及兒女柔聲忍淚和妻語東家愛子如掌珠十  
畝九畝無禾黍西家瓶盎頗有粟賴彼疇昔忍心齧  
我今亦欲效其尤直待年豐去相贖妻曰此事惟君

爲婦人何得專主之與其不稼死相藉無寧剗肉俱  
無飢只恨身多腹與口致使兒女不相守兒皮女肉  
種滿田且耰且泣兒知不見知兒泣兒自傷形影羈  
孤天一方日遠日忘惟力稼田禾且喜過人長田禾  
過人誰不樂翻覺此身無處著根柯椀大復鬱葱今  
歲有秋定不薄時當五月黃梅候風雨連朝不稍宥  
桔槔帶夜翻田波所出不勝所入驟高者之禾仍鬱  
葱下者已入馮夷宮十存六七轉相慶家破兒鬻非  
無功是月廿三聞水信一時老幼集成陣彼言屯穀

之家往往造此言此言溝塍早晚亦空慎或信或疑  
恣喧闐力旣不足乃貪天貪天究是自取敗水勢如  
山非昨年六月望後水驟至倉卒責効何濟事拆門  
拆版作田隄人盡水立十夜不得睡水作威靈遠坵  
流田岸不崩流不休怒浪撲天聲百里哭聲能使水  
聲柔愚夫愚婦愚誠愚詈天詈佛日無虛詈天不應  
縱茲水詈佛胡爲災我畬去年前年禾亦沒貧者痛  
哭富者惟咄咄今年富者哭益慘自言脂膏剝盡獨  
餘骨高者下者盡陸沉不愁來歲愁而今來歲尚遙

可以遲迴別爲計而今四方蹙蹙靡騁飢難任不如  
棄此懷中赤拋入波心飽鱸鯽其父其母尋與俱亦  
有自經登鬼籍死者已矣生者寒就食他方乞食難  
昔買之牛今復賣昔處之廬今難安賣牛賣屋滿城  
隅木石山積人無需百千之直不敢賣什一但求售  
去猶可活斯須嗟嗟民困斯已極君門萬里誰能  
及安得鄭俠復上流民圖使我四海八荒之民莫安  
無反側

范公隄

本場人 吳嘉紀

范公勞苦築長堤洋洋潮汐不復西黃壤黑壤接廬  
舍南場北場多鳴雞運鹽搨搨車在野穫稻蒼蒼水  
映畦老弱嬉遊日無擾風俗宛與成康齊遺愛千年  
東海濱只今強半是蒿藜此中啼號有赤子長者試  
與重提攜

頌汪芾翁公祖

五首

吳嘉紀

嶺梅豈不清感人者芳馨黔首雖至愚懷德有同情  
荒荒瀕海壤役役煎鹽氓終歲供國稅鹵鄉變人形  
饑兒臥草根蟋蟀共悲鳴倘不逢良牧何繇慰羣生

撫字日已勞罷癘日已寧祝良作甘澤遍野起歌聲  
又

夫子昔高臥別業吳山下圖史娛兄弟吳越擅風雅  
冷然湖山際襟抱各瀟灑令譽倏以廣長嘯別松檜  
伯子陟雲霄仲氏膺民社蒼茫潮汐區何堪詘靜者  
鷗鷺迎清琴蒹葭隱班馬煌煌瑚璉器光采及原野

又

風潮飄蕩後萬井莽荆榛黃草連遠天鳴雁愁殺人  
茲鄉實寒陋亟亟思陽春春風一朝至草木鬱然新

噓煦六年來慈祥四海聞當代選循吏徵車正麟麟  
赤子涕漣洏唯恐失其親耆老扶竹杖鄙生出山雲  
未暇贈劉寵方將借寇恂

又

鷺鳥避叢棘鯉魚肥淡水仲舉稱高賢乃下徐孺子  
孺子不仕君榮華草菅視一榻何戀戀心實感知已  
往來古不廢干謁予所恥軒車遇鶉衣攬結若蘭芷  
野月臨冰雪田玉出泥滓孤雲漫悠悠偃室重貧士

又

頻年禾不登流離滿海邊困餓傷萑葦容易把戈鋌  
使君騎馬來淚迸流民船賑饑日行野糴米時借錢  
或有強肆者辱之以蒲鞭一誠消衆蠢散去如雲烟  
只今中十場里巷何晏然牛車夜不歇雞鳴月在天  
民物各自得誰知官長賢

又

本場  
王言綸

大地誰畱黍穀春使君吹律煦斯民窮檐鳩鵲形皆  
變荒海鯨鯢跡盡泯任飲貪泉心不易從違髦士意  
相親淮南久著蕃宣頌拭目徵車就甫申

又

沈聃開

江南江北諸君子頌公之德已如此中有遺漏余補  
之畱與他年煥青史公未至止蝗蔽天有田士庶同  
無田禾青遍野一時盡有如狂燒燎原然公蒞茲土  
蝗如故毅然下令惟曰捕石蝗斗粟給飢民民來趨  
事如趨父築坑築坎得蝗多蝗出粟歸歡如何復虞  
蝗盡粟亦盡老弱不得沾餘波妖不勝德神亦懼不  
煩民捕自驅滅蝗蝗魚貫抱空枝枝空翻以蝗爲葉  
自茲他境雖有蝗曾無一羽入吾鄉壬子之春蝗復

來但嚙草木禾無傷於戲頌公之德兮此未詳公未  
至止海屢潮颶風一發地天搖畜產廬舍盡漂沒鹽  
烟百里俱寥寥海潮爲禍固云烈國計民生猶未絕  
辛丑乙巳兩年來瀕海編氓靡遺子雨工吳二發潮  
機毒龍怪鱷肆潮威平地洪波三十丈間有逃者將  
焉歸范公隄畔屍如山民命不啻如草菅鹹流西下  
入田畝田禾無一如初顏公蒞茲土海猶昔其神海  
若凜公德凡公聽政六年中欲一揚波何可得於戲  
頌公之德兮此未及未及未詳斯二者肯亦雷同出  
必有人知

地震詩

沈聃開

人下泚筆爲公再拜言願公世世司民祉自分衰庸  
爲世遺等閒不敢奉公惟倘采芻蕘欲相詢沈聃未  
必有人知

暝色入窗尋倦人  
牽幃已作夢中身  
駒駘移時悚然  
寤牀忽化舟將沉  
淪黑風颯颯吹四廣  
梁棟桷榱齊  
合響墮瓦飛  
輒遠近聲共成  
霹靂轟下上月星  
雖在  
光無多腥氛毒霧紛  
羣魔鬼馬踏空沸  
天鼓播搖大  
地如江河東家屋覆  
兒呼母西家壁仆夫  
喚婦獨有



吾廬堅且完作崩頽勢亦良久鄉鄰老幼爭出屋不  
遑衣鳥裸相逐狂奔一步一顛躓猶尚回頭招骨肉  
雜沓喧闐助震威地猶翻掌身何依余只僵臥堅不  
起知生爲寄死爲歸簸盪甫定月復皎不圖次日有  
清曉相傳閭里傾覆家傷者較多不傷少統計五十  
四年中地凡四震丁我躬緬憶有明天啓歲其時地  
震余猶童向後鼎革震凡二一震殘春一長至俱較  
此夜爲逕庭要是人心化災異今年霪雨春接夏淮  
揚什九秋無稼秦郵之水淮泗來隄圻忽從天上瀉

下者之民身其魚况乎星變日無虛太白晝見光四  
溢能使太陽成蟾蜍草莽雖無係得失側聞自古操  
史筆爰書地震今何時戊申六月十七日

明

何梁八景

范堤烟柳

秦州凌 儒 都御史

長堤捍海幾經年萬柳青青含曉烟鰲極永安潮應  
月蜃樓高結碧連天自宐煮水堪成賦不復揚波好  
種田我亦鄉人事疏鑿漫將經濟繼前賢

董井寒泉

前人

報德何難自鬻身  
縲絲人遠事猶新  
金梭尚照西溪月  
玉井長流東海春  
萬古綱常垂勝地  
千年祠屋傍通津  
漫遊憶昔曾瞻拜  
採拾芳言字字真

葦灣凝碧

東臺 錢象乾

漣漪曲曲傍溪流  
景物依稀古渡頭  
水色澄清明月夜  
楓林蕭瑟遠天秋  
一聲孤鶩依霞落  
幾片輕帆近浦收  
憑弔勝遊渾似昨  
蒹葭白露思偏幽

新市騰譁

前人

橋連新市傍清流  
旅客于茲聽曉籌  
水道錦帆飛彩鷁  
芳隄玉勒快驂驪  
喧譁日日盈雙耳  
景物時時醒醉眸  
萬籟寂然猶有傲  
誰家吹笛出高樓

古堰朝烟

江西 魏學唐

參差萬柳曉烟霞  
翠拂長堤春未闌  
孤鶩聲聲蒼澗近  
棲鴉點點有無看  
幾家耕牧時方暇  
到處桑麻露正溥  
自是當年流澤遠  
至今此地絕波瀾

晏溪晚翠

福建 陳伯陽

登臺遠望石林隈  
積翠重重晚不開  
霞落溪邊隨水

去風從樹杪送雲來負竿釣叟魚同返擊鉢山僧月  
共迴對景時堪舒一嘯何勞倚劔欲無媒

霜華萬嶺

徽州趙璧

海嶠重重玉作山嵯峨常自近扉闌點峰積雪消難  
盡覆嶺嚴霜望裏看佳味幾從熬瀚海冰花常是徧  
塵寰儘教聳峻舒邊急應念嗟民煎曬難

蜃氣千團

前人

瀚海無驚鎮日閉熬波處處曉烟乾隨風淡鎖高低  
樹翳日輕勻遠近山四野彤雲非釀雪百川晴霧盡

地嵐年來萬課輸邊足疑是諸團瑞靄殷

解嘲

蘇州范仲淹

卑栖曾未託椅梧敢議雄心萬里圖蒙叟自當齊黑  
白子牟何必怨江湖秋天响唳惟聞鶴夜海朦朧每  
見珠一醉一吟疎懶甚溪人曾信解嘲無

晏溪馴鷗

范仲淹

萬物有常性性無不貴生鳳翔與駿奔一一遠害情  
歎彼沙上鷗皎皎霜雪明夜宿滄浪靜日浴滄浪清  
何以狎谿人谿人澹無營衍衍自飲啄依依亦逢迎

徘徊兩無猜何慕復何驚

謁三賢祠

凌儒

捍禦勲名仰大賢齋心今日拜祠前  
魚鹽地僻十年產桑柘村成萬井烟  
水國衣冠瞻瑞日海濱耕鑿戴堯天  
先憂久負平生志獨對春風思惘然

題范文正公講書堂

在西溪

凌儒

昔賢能化俗千古溢遺芬  
舊市殘秋社空堂薄夕陰  
蜀人思有淚漢室歎無文  
一片蒼苔月曾過照使君

題董子祠壁

本場

陸原博

千年遺事青山在塚草凄凄帶淚痕  
環珮不歸雙鳳杳白雲長日護溪村

題貞女楊善貞

安豐

王民俛

盈盈十五誓冰霜不識夫容哭未亡  
冷瑟無絃風咽恨栢舟有賦鏡埋光  
養姑緝緝蓮心苦賫志淒清玉骨香  
三十年來肝作鐵好畱青史振綱常

貞女篇

江西

魏學唐

韶齡許君子燕婉期百年寧知賦命薄  
未婚失所天九死期同穴太姑慰得全  
應門旣無童負郭靡有田

中十場詩卷之十  
歲晏衣未製午過突無烟時有傷心語耳畔何便便  
謂言栢舟詩寧勝凱風篇殉節空自苦飢寒竟誰憐  
女聞悲且泣標擗號蒼玄妾心固匪石比之石更堅  
貞松挺寒翠忍使柔蔓纏苦節益自勵之死矢靡愆  
淒涼三十載緝纆供粥餽未亡徒形骸神常守重泉  
念有桑榆父形影暫相憐悲哉淄水婦此苦更難堪  
烈哉浣紗女此志尤凜然一腔金與鐵百鍊性不遷  
寸心星與日千古色常鮮寄語採風者殷勤載簡編  
皇清

頌分運汪公祖

本場周

漁

進士侍讀

餘杭間氣產名賢下里何期獲一天善政初行周遠  
邇仁恩溥播及飛潛夜淡皎月萑苻靜春老和風桑  
柘妍童叟歡呼齊祝頌自有賢聲徹御前

明

梁塚八景

白木古堰觀濤

興化吳朋

突兀長虹障北潮蒼茫一望海天寥勢排山嶽連雲  
暗聲挾風雷震地搖雪覆千峰圍曲岸烟迷萬樹接

重霄桑田到處堪耘耔捍海芳踪尚未遙

長橋望月

本場  
劉爾冲

白水清沙遶綠疇參差燈火散漁舟芙蓉岸隱鴛鴦  
夜蘆荻花淡雁鶩秋銀漢扶疎纖翳絕碧潭澄澈水  
痕收西風浙浙窺人髻一夕寒濤送客愁

石澗清聲

劉爾冲

夾峙天門吞夜光飛泉咽石曉蒼茫簫韶疑自蛟龍  
窟鼓吹時驚鷁鷺驚行地運金錢充北闕水環玉帶入  
南梁邊籌正自勞當宁莫遣齊民歎揭裳

賢祠古蔭

劉爾冲

喬木清陰覆古堂人人思祝萬年觴裴公嶺上松猶  
茂蜀相祠前栢更香今日好春畱白晝當年世事足  
黃梁惟存手澤垂霄漢誰謂甘棠德可忘

柳浪聞鶯

吳朋

春風昨日遍柔條公子雙雙巧弄簫烟外宮商如覓  
侶雨中梭杼解傳嬌淺黃嫩綠輕勻綴緩舞清歌若  
待邀幾度飛栖如告語韶光九十景偏饒

層樓俯睇

劉爾冲

危樓迴坐翠微邊，俯矚清流碧且漣。  
捲幔孤帆來遠近，開簾雙燕去蹁躚。  
春風爛熳花圍寺，曉日陰芬影入淵。  
天籟漏淡何處發，渾忘玉露溼階前。

銀塘疊翠

吳 朋

十里風光落翠窩，望中芳草與烟和。  
嫩叢疊碧承車馬，柔蔓含情媚綺羅。  
到處開樽堪枕藉，幾回狂舞任婆娑。  
陽春有意牽遊興，隨在青裯襯綠坡。

玉井流甘

劉爾冲

何年卓錫惠爲賒，神運中泠到海涯。  
蓮社吞殘仙掌露，蓬門飲遍雪花茶。  
銀牀墜墜三秋葉，玉井涔涔十丈葩。  
老衲談經渾不息，輓轡聲裏法音譁。

弔周烈女

本場 何聯芳

從一堅貞古所奇，尤憐未字殞身隨。  
形俛玉樹培連理，魂引金繩續結禱。  
紅雨泣春鶯，夢短綠雲粧冷鳳。  
歸遲栢舟莫道高，千古媿美人間更有詩。

潮變有感

前人

望斷滄溟赤水隈，愁氛橫鶩畫難開。  
光搖夜壑流陰火，響疊秋濤隱地雷。  
雞犬也知隨物化，蛟螭真欲逼

人來飢魂飄泊無依著月黑風高處處哀

陳孝子廬墓

前人

望中片碣表新阡叢棘蕭蕭倚暮烟忍對狐丘封馬鬣漫營蝸室伴牛眠林花淚染三春艷隴月神傷五夜圓極目親魂何處是血痕灑向蓼莪篇

明

丁溪八景

鶴廳留月

典化張孺教

古署無譁夜正悠中庭月色一輪秋琴聲鶴唳皆清

籟疑泛仙槎向斗牛

鳳井鳴瓊

前人

翥鳳嶷然地脉成源泉混混發雙清轆轤響徹梧桐目疑是雝雝獻瑞聲

蓼渚搖金

前人

西風蕭瑟碧雲低紅蓼花開入望迷斜日半天迴晚照却疑宮錦亂離披

仙掌懸壁

前人

仙掌高擎兆地靈宛然環壁奠中泠千秋間氣當年



發曾捧圭璋贊大廷

金鈎晚翠

前人

半畝牛眠狀玉瓶金鈎斜控氣含靈晚來烟雨籠芳  
樹疑是遙山疊翠屏

玉帶春流

前人

曲曲漣漪市作垓江淮餘潤白天來三春雨露波濤  
急應有魚龍聽震雷

勝駕輕帆

前人

一派溪光遶市廛垂楊低映自涓涓錦帆簫鼓春遊

暇恍惚乘槎向日邊

義阡曉磬

前人

曙色微茫烟霧朦梵宮尚在有無中疎林陣陣聞清  
籟應是金聲逐曉風

拜墓

本場高穀宰相諡文義

百里丁溪路聊為半日延市喧多客貨地僻有人烟  
細雨纔將霽斜風又作顛先塋供事畢歸去片帆懸

咏兩廂瓜圃

典化十二本場楊田果戶部侍郎

東陵五色舊相傳九彩今看亞兩川雨後婆娑新蔓

立風前嫋娜亂花翩味甘米火懷王母色爛金細憶  
傳玄爲愛織絺承白玉掛冠須築邵平田

趙長者詩

有別

本場

王元吉

趙長者名禮字信父丁溪場人生而寬厚未  
冠時父聞同里孟翁女有容德爲聘之時女  
年十四矣初翁有子女輒殤天晚得是女鍾  
愛之及笄以目疾瞽翁病焉辭婚于其父父  
以語長者長者曰不可始孟氏許我時目固  
明今不幸致此而渝盟遠近知女瞽誰平娶

且翁夫婦老且死無依不若堅前好父喜謂  
其母曰吾兒真有華陰呂氏風旣娶相敬如  
賓生子女十一人玉其中子也中年家益饒  
迎翁夫婦就養焉翁歿葬如禮鄉士大夫咸  
稱趙長者事親孝與兄裕弟瑩無間言以壽  
考終於家玉之外祖母嘗以子撫之長而知  
讀書奉外祖母如父卒服喪三年歲時不絕  
祀今爲水軍都萬戶云

淑女春闈秀仙郎玉樹姿目從何日瞽義守百年期

團月開紈扇雙星結彩襦  
輝磨鏡匣流響蜀琴絲  
遂叶熊占夢旋生燕頰兒  
德齊中饋禮恩出外家慈  
蒿薙俄霜露蘋蘩數歲時  
畱題長者傳庶望厚民彝

袁智周佩刀歌

有引

前人

智周字道濟善醫世爲丁溪人至正間父受  
豪強橫辱死智誓必復讐陰佩刀俟間凡六  
年不得便適逢亂有司禁持兵乃棄刀邗溝  
未幾豪亦死非命其終天鉅痛無時而釋也  
儒先爭唁之以文予作佩刀歌

鹵豪煮海地沸蒸忽報孝子蒼天崩披髮誓雲雨若  
鷹百金一片陰壑冰六年泣血絳雪凝悲風淒淒常  
夜興妖狐戴髑鬼物憑含沙時于左右肱陸阻層坎  
渡阻溯歎歌獨漉氣填膺刀亦汝知龍駿騰神鋒寒  
芒鐔威稜仰號彼蒼奚曹曹斯須間隙不可乘坐令  
骨立枯厓藤墓廬青冷栢明燈矧有母老髮鬢鬢破  
涕爲笑躬豆登無何讐家死棘荆臭肉厭厭蚋與蠅  
天其假手俾世懲人生五倫首父子復讐義昭春秋  
禮見遺刑書著諸史宗元議足垂千祀倒行逆施伍

員恥舞陽吉玃同轍軌老涉遲鈍幼趨偉固關時命  
非偶爾嗟唧被兵家轉徙事往行存宐繕紀醪醪花  
香鯉搖尾癯然鶴行過客邸欲言復吞髣颯耳婢婢  
猶嬰慕焉已酒酣問刀首如之忍歸武庫投邗水水  
收烟消淨霜葦電光霍霍無時起安得河泊以鑄授  
烈士來丹積冤從一灑

袁孝子篇

本場梁寅

翰林編修

海陵袁道濟爲鹽丁其父受富豪所凌轢死  
非命道濟茹哀廬墓三載山東張縉爲作傳

前御史趙侯子威尹於是復爲上其事侯之  
子致本學於予因請予賦之

袁孝子事死如生生欲死海鹽場上淚眼枯哀心無  
窮海之水誰云猛虎凶誰云長蛇毒咄爾凶毒人何  
獨無骨肉爾身雖齧斷腸已裂我腹父也啣冤螻蟻  
鄉兒猶飲食被服裳皇天昭昭運三光如山之罪胡  
可以掩藏暑臥埃塵寒臥雪霜狡兔躍我前野狐噪  
我傍父魂有知兒共處母身未忍兒身亡嗚乎天下  
幾人冤且苦孝子三年獨廬墓官書大字表門戶更

願除却人間蛇與虎

送張掾回兼勞苦洪雅士夫詩良王勉讓

公嘗知定州有善政民思慕之不遠萬里來同安故公作詩以送之

解組歸來已六年宦情恆夢在西川正堪菊酒依籬

下忽有鴻書到海邊為政久慙循吏治問安溪荷庶

民虔洪陽此去勞相語閒讀南華種林田

皇清

頌分運汪老公祖 本場 馮喬望 庠生

疇昔聲名著帝鄉災黎何幸得循良數年洪水雲

俱黑此日鶯花坐有香清節嶙峋傳海國高才赫奕

震邗江謾言撫字心偏瘁應有 綸音出 廟廊

明

拈茶八景

北山晚翠

本場 繆四明

點點崕嶺亦翠微當年風景自依依只今春色還如

此絃管無聲遊客稀

西寺晨鐘

前人

曙色微茫映太清忽聞天籟度虛聲直須振醒人間

夢指顧乾坤盡大明  
問天鯨虫盡蕞直  
能跡躡人間  
漩潭映月  
前人

鏡面平鋪湧碧波  
汪洋偏載月明多  
莫言地僻鍾靈  
少亦有蛟龍入海窩  
前人

龍窟寧潮

前人

高閣逶迤可摘霞  
老龍聽法海潮賒  
可憐風景殊非  
昔古樹含烟起暮鴉  
前人

長橋虹影

前人

虹橋突兀鎖中流  
斷雨淒風幾度秋  
只有朝宗稱不

改古今無恙自悠悠

古堰棠陰

前人

海患從今盡可防  
桑麻處處羨甘棠  
長堤若解畱功  
德芳草含情映夕陽  
前人

八堡春耕

前人

雨足春淡處處耕  
隴頭事業孰相爭  
莫言八堡皆沮  
溺世路于今尚不平  
前人

九澤夜釣

前人

海上從來可避秦  
九澤烟月自宜人  
歌聲款乃青篔

客一線何曾染六塵

贈繆思敬謫戍洱海

麟游宋志

漠漠雲間銅柱連朔風寒雪傷殘年人于離別情偏  
重事到崎嶇節合全九死一生投瘴海千山萬水出  
秦川臨岐莫歎恩波遠聖主回天即用賢

又

雲間趙濟

渺渺南行道君行值歲殘貂裘風獵獵胡馬雪漫漫  
骨肉家千里艱危石百盤幸存生面目猶是聖恩寬

又

扶風陸景

盡言本臣節不死卽君恩萬里依銅柱孤身度劔門  
瘴雲溫潑墨蠻雨冷翻盆最是關情處君行自討論

又

扶山張京

天子恩深死復生孤身萬里嶺南行荔枝盧橘關滄  
飯雞骨鵝毛共世情湘水夜深冤鬼哭長沙日落旅  
魂驚從來竄客知多少別淚臨岐漫濯纓

贈繆思恭陞杭州二守

虞山胡宗元

秀州兵後得廉循治劇長才正策勲綠野雨餘無曠  
土黃堂風動已修文分符又趣錢塘郡視篆何慙謝

使君日轉棠陰初退食西湖春水落鵝羣

濬河有感

本場 趙有馮 知事

淮水西來路轉微拚茶東去益淒淒烟迷海島行人  
少日落孤汀見雁稀四望鹵田渾是蕩幾家茅屋半  
無扉當年虎旅揚兵地惟有寒鴉遶樹啼

窮民謠

本場 繆四明

濱海天時久不和春霖夏旱秋洪波麥苗已絕三農  
望更有紅塵侵稻禾數載農夫無立錫十家常有九  
家飢田園慘澹渾無色野境荒涼盡宿狸霜葉蕭蕭

鳴屋角殘簷破壁西風惡短鶉百結不能眠肌膚如  
冰指欲落起來覓火向鄰家粒米如珠不可賒拾得  
樹皮和菜煮逡巡已覺日頭斜三食五日何曾殼黑  
髮朱顏皆槁瘦肝折心摧欲粥兒攜兒粥遍無人售  
况值三冬雨雪天黃沙漠漠更堪憐四郊空有人家  
影百里何嘗起爨烟一番雨雪一番啼最是孤兒共  
寡妻瑟瑟耳邊聲不斷浮雲蕭索日淒淒太倉有粟  
多紅朽壯哉鼠雀耗之久飢民望濟眼血乾門高萬  
里空回首我行其野獨躊躇筆下愁生自不誣皇華



知有賢良客必為窮民上繪圖

題張鶴妻節婦繆氏

本場李譽把總

七十春秋四十孀節操無玷類共姜佳城瘞玉千年

潔青史垂名百世芳

題節姑繆孺人

本場繆洵節婦姪

傷哉姑氏節獨立歲寒淡機杼三夏月冰霜萬古心

無瑕堪羨玉百煉始知金黃壤同歸日清風播德音

皇清

頌分運汪芾翁公祖

本場繆彤狀元修撰

憂時聖主意何窮到處輜軒為採風循譽喜從枌

里得殊徵直與漢書同妨民社鼠駟為盡裕國邊

籌畫已通最是撫綏堪表異聲名且晚帝宸通

又繆祚武進士守備

英英才藻歎猶龍擊缶聲傳桃李濃名杜循良懸素  
月龔黃卓異映丹楓一庭花發垂簾靜百里歌清比  
屋雍拭目徵書求補袞福星分照海天東

又蔡苞武孝廉

名杜仁風世所師海濱遺姓寄安危醇醪淡飲原多

醉蒲杖高懸自不欺信是雄才非百里故從異政報  
雙岐郊原處處歌來暮愁說當初峴首碑

明

草堰八景

東梵晨鐘

本場袁三餘

仙梵遙臨自赤烏別巖疎樹聽鐘呼道人未入非非  
想也學皈依金粟胡

西山夕照

前人

幾家村落樹平行處處歸鴉帶夕陽水近金烏成錦

浪翻疑赤壁滿橫塘

南浦春雲

前人

春色晴薰柳欲迷鶯聲初過百花谿遊人買醉長堤  
上一派輕雲護馬蹄

北橋秋月

前人

飛虹長拱石梁秋一片冰壺萬壑流銀漢月明天似  
洗御風人擬弄珠游

天池魚鳥

前人

一鑿方平遶翠微風波不到洗雲衣濯纓孺子歌還

聽無數鳶魚寫化機

望海山亭

前人

地缺埏垓渤海濱官亭翹首是洋津東南財賦于茲

盛苦殺東南煮海人

朱泊漁燈

前人

沽魚換酒碧雲西眾艇垂陰萬柳齊野爨灘烟波細

細滄浪一曲醉如泥

范堤牧笛

前人

啼鳥飛花碧柳垂郊原草綠正歲蕤兒童短笛橫牛

背誰是青精飯後吹

送懷堂袁姻丈節推雷陽

興化李春芳狀元宰相

送君萬里道意與道俱長氣候殊炎徼音書渺故鄉

嶺雲逃去憶江月聽鳴榔不及羣飛雁遙天自一行

贈節孝

本場袁念巖

十九初出幃明月吐光輝入門供湯藥塵垢暗蛾眉

三年殞所天庭中啼妖鴟高堂與襁女忍死相扶持

河伯毀田舍環堵風雨凄青燐照流黃勉力供饘飴

大耆偕老親颺颺櫻櫻彌苦節世所難貞孝永不移

中十場詩卷之十  
躡辛七十年白璧無纖疵何以蘭蕙質成此松栢姿  
天柱有時艷芳馨萬劫垂女訓閨中聞彤管有榮施  
夏滂  
袁三餘  
水浸田畦沒四圍波漂廬舍稻苗稀黑雲潑墨飛蒼  
狗綠樹橫嵐點翠微山色盡迷惟霧擁溪聲還帶落  
霞飛千家懸磬渾如洗縱鶴魚肥鳥雀飢

苦旱

袁三餘

稿苗枯樹火雲流水涸魚窮陸地舟最苦田家烘赤  
日桑麻空自祝山丘

並蒂瓜爲袁烈女賦

木場單乾社

昔望葛相依今爲瓜並蒂冰霜勵子心天日明余誓  
生未共衾禡死期同穴瘞無徒抱蔓觀當作連枝契  
不散惟英魂浮生皆幻蛻藉此瓜虺形發彼網縕諦

明

角斜八景

東樓望月

東臺

錢象乾

危樓百尺聳青霄良夜蟾蜍出海潮萬頃蒼茫天一  
色銀城無際遠迢迢

北海觀潮

前人

浩蕩烟波溢大荒東來萬派勢汪洋鯨魚鼓吹濤驚  
雪星斗光搖白渺茫

寧橋濟渡

前人

跨水長梁竦在東百川環向脉流通朝來車馬爭先  
渡睇望還疑圖畫中

平堡耕耘

秦州馮昌胤

隴頭烟雨土膏新四野賡歌慶澤深始信太平真有  
象一簣耕破隴頭春

張港漁歌

前人

蒼茫一鑑水漣漪正是漁家獨醒時半棹歌聲歸去  
晚清風明月兩相知

高原牧曲

錢象乾

細雨淒風碧草肥郊原一望盡依依牧童簑笠橫牛  
背短笛吹殘送落暉

范堤魚鹽

馮昌胤

曲曲長堤倚碧空網羅負戴日匆匆東南海錯於茲  
勝誰識當年捍禦功

細市梁貿易樂也

前人

長橋斜引北溪流貿易紛紜此地收國課年來輸輓  
急好通泉貨慰民憂

喜雨

徐鵬舉

分司

天久旱不雨致禱乃大雨三日田疇沾足喜  
而賦此

三日甘霖天上來海濱枯槁復栽培三農鼓舞歌時  
雨誰識東坡志喜懷

閩煎

前人

下馬觀丹竈居民住海邊水鹹天地味潮湧國儲泉  
矮屋栖雞犬通家事煮煎不經親耳目民隱幾人傳

海門

崔桐 探花

今歲東隅厄傷心北海翻萬民葬魚腹百里化龍門  
灑血悲親友無家問子孫寄言當路者早為叩宸闕

新命其二

盡日蛟龍鬪俄時天地渾丈濤從北漲萬戶總南奔  
赤子隨魚鯨洪流失市村有生知亦死何計覓饗殮

詩

晝吼如雷雨旋翻過屋濤兒沉父莫救夫失婦空號  
梁棟浮輕葦牛羊傷九臯哀哀殘喘者誰爲贈衣袍  
盡日共四圍知者大則知者小則知者  
薄命嗟羣鬼求生盡失謀幾人能抱樹無數任隨流  
形改何從辨骸沉孰爲收豈知殲餓殍青史亦名留  
其五  
潮回無綠野禾稿盡黃雲夜哭喧新鬼孤行寂故羣  
未鋤農失業雞犬野無聞皓首時東望沾巾對落堊  
明

小海八景

東梵晨鐘

本場單一鳳

野外孤山樹作鄰白雲晶晶覆垣堙東風時送鐘聲  
曉驚起漁樵夢裏人

西原夕照

前人

登高眺望暮忘歸萬樹栖鴉噪夕暉無限物情牽賞  
興落霞孤鶩與齊飛

南浦春雲

前人

楊柳垂絲正暮春詞人載酒坐花茵細推物理浮雲

態變盡蜉蝣一幻身

北橋秋月

前人

渡口西風北水寒石梁危聳往來歡  
褰裳不涉歌天造更望秋蟾映碧潭

天池鷗鷺

本場  
唐宸賡

清漣十里泉煨劫從未乾幽壑靜無咎  
倦鳥飛知還鷺行排雪立鷗隊枕沙眠  
不盡臨池感忘機民葛天

望海山亭

前人

衣物不終朝滄桑幾遷改古來華屋誰  
今只青山在

闔境無高岡睽茲稍崔嵬振衣巔上亭  
縱目窮大海

朱泊漁燈

前人

落日憑西盡蒹葭入暝初滄茫迷泊水  
明滅點村墟螢稻隔溪似星鉞映水如  
數聲來款乃始識是栖漁

范堤牧笛

前人

春日星見龍堤草長青簇襪襖傲烟雲  
鞭策司中犢不解白石歌誰能漢書讀  
嗚嗚短笛聲吹老海天牧

弔袁貞女

單一鳳

浮生苦樂樹花飄難得芳名百世標  
天上赤繩虛月



老人間清譽薄雲霄貞魂貫日輝千古烈性如山壯  
至朝一片冰心沾澤露夕陽青塚悼漁樵

憂蝗

本場 單元社

策馬過田家飛蝗撲面遮蓋天衝似雨覆野聚如沙  
極日窮秋隴應憐卒歲華君王吞不盡堪為小民嗟

贈別陸場使

唐宸賡

風流三載令君香借寇無由祖道長此去鶴琴羞俗  
吏何年龍劍會仙郎姑蘇臺畔花為谷揚子江頭柳  
拂航遺愛不隨羊祜去堰人久矣賦甘棠

八月龍覲

本場 唐應元

秋淡殘暑尚炎蒸赤日雷聲電復凝動地風煙驚出  
沒燒天鮮甲忽升騰莫云致澤稱予聖轉覺愁霖妬  
爾能但使湯年勤瑞世不堪水國助襄陵

補遺

縑絲井

仙女縑絲處

安豐 沈珩開

西溪廣福寺是後有仙井四時味甘冽旱天益清冷  
傳聞古孝子厥名為董永以身傭萬錢歸葬竭踵頂  
中路得佳婦供役於其境機杼月百縑夫婦翻萍梗

但見來路雲不見去人影至今井就荒涼月下修綆

鳳凰墩

在分司署西八蜡廟中

墩以鳳凰名在昔應有以白雲來其顛梧竹散秋水  
梧既有嘉蔭竹實亦堪餌胡為鳳不至旦夕凄風起  
傷哉孔仲尼能不歎已矣

靈異泉

今在繆氏宅中

相傳拼茶東官井號靈異有明嘉萬間中作潮汐勢  
每逢倭入寇怒湧溢常位井水出井口高以尋尺計  
盤旋久未下居民識豫避全活者無算斯為王者瑞

一井賴保障將以寤循吏

辭郎河

仙女別董永處

辭郎復辭郎乃至河之滸仙人亦有情能無別離苦  
雲來是今日雲去成往古河流仍活活路草仍靡靡  
衣裳仍蕭蕭形影仍踽踽迴思一月前夢寐生悽楚  
哀哉董孝子重婦在葬父雖不篤房帷亦既為夫婦  
亦既締同牢能憇棄中路土人重其義立廟別離處  
所以此河上春秋賽村鼓

牡丹亭

在安豐察院廳事北今廢

東淘廳事北傾國說名花黃紫軼姚魏春暮爍晨霞  
厥亭惜不永天香無處誇譬如石季倫計然陶朱家  
在日何赫奕轉睫同泥沙學道苦不早往事徒咨嗟  
何不爲松栢歲寒仍槎枿

三昧寺

在何塚卽聖果園

昔爲聖果園蕃僧浮鼓處有唐迄今茲海雲仍絮絮  
高柳集栖鴉梵唄徹昏曙諦觀蓮座上不是蕃僧踞  
豈其渡海來復坐海潮去徒倚鐘磬中盛衰安可據

中洲山

在西溪北范文正公築以望海

范公蒞茲土深慮海爲患旣築捍潮堰中虞或惰慢  
聚土爲中洲海勢歸顧盼民生賴以安畜產靡渙散  
青青欲至天竹木多藁灌山色莽從巖世遠猶傲岸  
耿耿聖賢心人今但遊玩

葦灣橋

在東臺城西半里許昔通舟楫今淤相傳有異僧折葦渡海棄葦此橋下因名

一時二異僧不知孰先後浮鼓與折葦均如有神授  
孤行風濤中矯矯不能覆鼓畱聖果園葦棄此橋右  
此橋今就毀葦灣名自舊居民雜處間不聞河水溜

范公隄

是隄歷唐宋築者非一人民必曰范公可以觀公仁  
他人非不力唯公爲諄諄所以此後世窮海多陽春  
隄百七十里蜿蜒東南垠迤邐如波形波乃不能湮  
春夏草芊芊一望青如茵田禾遂嘉茂鹽車日麟麟  
國計日以裕民生日以信此隄日以遠公名日以新  
李唐及趙宋宮闕今成塵擾擾懷古者何勞多悲辛

勉仁堂

王心齋先生祠也在安豐月塘灣

安豐月塘北數楹俯河干中祀王夫子玉骨金筋顏  
魯東生鐵漢高風起懦頑師事文成公良知義以殫

嘗作吳越遊所至多授餐不似古尼父削跡還伐檀  
士有遇不遇萬古一長歎我來謁荒祠瓦礫委茅菅  
梁棟悉以圯夫子塵埃間安得胡耿輩廟貌新塵寰

圖書



中  
一  
參  
言  
卷  
五  
上

吳

